

ASO LUA, 23 FEPUARI 2021

Na nofoia e le Fofoga Fetalai le Nofoa i le itula e 9:23 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoaio Faitulafono.

Ia, ua faamalo le soifua ua faamalo le lagi e mama. E ui lava ina louloua le tau, e aumaia lava e le Atua le avanoa e le gata i avanoa, a o lo outou malosia i le lagi e mama ma le soifua manuia.

TUUIINA ATU O PEPA

Na tolaulauina e le Failautusi le Faasologa o le Tuuina atu o Pepa e tusa ai ma T.T.49(2).

1. S.R.2021/3, Tulafono o Fanua ma Suafa 2020 – Faasilasilaga o le Amata Faamamaluina.
2. S.R.2021/4, Tulafono o Teuteuga o le Tulafono o le Ofisa Autu o Mataupu Faale-Tulafono mo Tagata Lautele 2019 – Faasilasilaga o le Amata Faamamaluina.

TULAFONO TAU FAAOFI O LE FAATATAUINA O TUPE FAAOPOPO (NU.1) 2020/2021 – felafolafoaiga faaaauu i luga o le faitauga faalua – Aso 25

FOFOGA FETALAI: E tolopo Galuega a le Fono Aoaio i le aso ananafi o lo o saunoa le Afioga i le Minisita o Faalapotopotoga Tumaoti a le Malo.

Ia, o le agaga o le faaaloalo ou te tapa lau Afioga i le Minisita e te tulai mai e saunoa ma tali atu i mea sa laga...

Oi, malie lau Afioga i le Minisita ua pau i le Fofoga Fetalai, ou te muai tapa lau Afioga i le Palemia.

**Susuga Hon TUILAEP AUELUA FATIALOFA LUPESOLIAI
LOLOFIETELE NEIOTI AIONO GALUMALEMANA Dr. SAILELE
MALIELEGAOI (Palemia):** Lau Afioga i le Fofoga Fetalai ou te tulai atu

ma le agaga faaaloalo e faatalofa atu i le paia o le Maota i lenei taeao fou. I le afio o lau Afioga faapea foi sui usufono mamalu o le Palemene ua maleifua mai ma alafai mai i lenei taeao i faguga lelei. E faafetaia ai foi lo tatou Matai Sili i le lagi i le taitaiina mai o lo outou soifua e faaauau ai a tatou galuega na afua ai ona tatou tu tu i totonu o le Maota lenei o Tiafau aua faalagamaea a Taitai o le atunuu.

Ua ou tulai atu lau Afioga i le Fofoga Fetalai e fai se manatu puupuu lava e aoga foi mo le faafogafoga a le tatou Maota nei aemaise foi o le faafogafoga mai o Matagaluega ma Ofisa Sili o Pulega ma le tatou atunuu. A matau mai lau Afioga i le Fofoga Fetalai i le faasologa o saunoaga a Minisita e tali atu ai i nisi o mataupu sa laga i saunoaga a sui usufono, o le matou tiute lea o le faamalamalama ma tali atu. E i ai foi le talitonuga, e le o se mea leaga le faamalamalama, ia susulu atu ai le malamalama ia i latou foi o faafogafoga mai i le mea o lo o i ai le le malamalama. A matau mai lau Afioga i le Fofoga Fetalai, o lo o talatala atu i tua saunoaga a sui usufono, ua le o faapumoomoo pe faavaapiapi i tulaga o manatu sa faaalua, a ua tatala atu i tua i le lautele o galuega eseese o lo o faatino e lea Minisita ma lea Minisita ona o le loloto ma le lavelave o tiute o lo o faaee atu i Minisita, aemaise le tele o le galuega o lo o faatino e i latou o Ofisa Sili o Pulega faapea foi o latou soatau e tali mai ai i tiute na faatautoina ai Minisita, e fai lava si loloto.

I ituaiga fonotaga faapenei i aso ua tuanai, e le mafai le mafai le mafai ona atoa faamatalaga e avatu, ia matua malamalama lelei ai le faafogafoga mai a le tatou atunuu. Ma e oo mai nei foi o lo o i ai lava le lē atoatoa. Mo sina faaitaiga, i le faatulagaga o tulaga tofi o Minisita ma le vatapuia lea ma Ofisa Sili o Pulega o Matagaluega o lo o i ai le tomai, o lo o i ai le malamalama i le faatinoga o galuega fai, e faalagolago i ai Minisita. O le ala lea lau Afioga e taua tele ai le talatala atu i tua o saunoaga a Minisita ina ia malamalama le atunuu i le lavelave ma le loloto o galuega o lo o faatinoina nei e tali atu ai i mataupu o lo o aafia ai le soifua o tatou tagata, aemaise o le faamalamalamaina o fuafuaga mo le taimi nei ma fuafuaga mamao, mo le faatinoina o galuega ma atinae e tataua ona fai i le taimi lenei o le lavelave o le vave tuputupu ae o le faitauaofai o tatou tagata ma mea e tataua ona fai, ia, aemaise o le osofaia pea o tatou mai uiga fesuisui i le tulaga o fefaatauaiga, i le tulaga o vesiga i fafo faava-o-Malo ma tulaga o faamai. E leaga o mea e tutupu i fafo lau Afioga i le Fofoga Fetalai, e i ai ona aafiaga i le tatou atunuu. E le gata i le agai pea i luma o tupe maua i fefaatauaiga, ae aafia ai foi ma le soifua o o tatou tagata, ma aafia ai ma avanoa tau galuega, avanoa tau aoaoga ia ma avanoa tau togafitiga i fafo. O le gasu lea ma le loloto ma le gaosa, lea e mafua ai ona... a matau mai, e pei ua tau umi nua le faamalamalama a Minisita. O le agaga lea, ia matua manino lelei. Aisea? Na o le pau lava lea o le mea e tali atu ai le Malo i ni upu tau faifai ma ni faamatalaga le faavaea e fai i fafo atu o le Maota lenei, leaga e le oo atu i ai le malosia o le

Kapeneta, seivagana ua soli le Tulafono e i latou o lo o faia ni faamatalaga le faavaea. Ua fefefe e fai i totonu o le Maota lenei. Aisea? Leaga na o mea moni mea moni mea moni e aumai i totonu. E tu ae loa lava se tagata e fai se lafoga le talafeagai faasao loa e au ma Minisita o le Kapeneta. O le ala lena e o ai i fafo ma fai ai uiga ia taufaasese ma taufaavalea, aua foi e le mafai ona tali atu au nei ma le Kapeneta i le tulaga faaletulafono e tapa ai faamaoniga ma fai loa i ai aulape e pei ona taoto i tatou Tulafono Tumau.

Lau Afioga i le Fofoga Fetalai, o le mafuaaga lena ua ou tulai atu ai, e faamalulu atu ai, o le a agai lava le Kapeneta e matua faamalamalama atoa ni mataupu e mafai ona latou faamalamalamaina i le loloto ma le gaosa o galuega o lo o feagai ma latou. O lou tulai atu lea lau Afioga, e le o se isi itu, ae pau lava lena o le itu, o le taumafai o au ma Minisita e tali atu i le anoano o le mau tuuaiga le faavaea e fai i fafo atu o le Maota lenei, ma saoloto ai ona e le oo atu i ai le malosia o lau Afioga faapea foi Tulafono Tumau.

Ia manuia tele le tatou alofaiva i le tatou Fonotaga i lenei taeao.

FOFOGA FETALAI: Malo faafetai. Ua saunoa faamanino le Afioga i le Palemia i mafuaaga e faapena ai ona faagasolo le tatou galuega. E le gata i avanoa sa tuuina atu i sui usufono mamalu uma o lenei Palemene, ae ua faapea foi avanoa o lea ua tuuina atu i le Kapeneta e saunoa ai e faamalamalama ma faamanino. E le gata i mea sa laga e sui usufono mamalu, ae faapea foi faiga faavae ma fuafuaga alualumamao, e le gata mo nei ma i e lua ma le lumanai. Ia, ona o le tatou valaauina, o tatou tatou te afifio ma tala mai aao tatou te lipoi ma tatou galulue e atiae le atunuu, ae faalagolago i a tatou tonufai i totonu o le Palemene lenei. O lona uiga, e ao ona faafofoga le atunuu ma malamalama i taualumaga o le tatou galuega ma le tatou Fonotaga, ina ia aua ne i... e i ai le upu foi lenei e aua ne i logoa i tua se... e pei lava o se fonoa a se nuu ae le fonoa se matai o se aiga, aua le logoa i tua. Ioe. O le mea lena e ala ai ona a aganoa loa pe avanoa se matai sao o se aiga, ona taumafai lea o le aiga potopoto e vave faatino so latou sui e aua ne i logoa i tua le tulaga o le latou aiga. A ia saofai ai le sao o le aiga i totonu o le faatinoga o fonotaga a nuu ma itumalo. E faapena tonu lava ma le tatou Fonotaga lenei.

Ua mafua ona ou fesoasoani atu ma tau piiama i le saunoaga a le Palemia, ona ua ou lagona le faanoanoa i le tatou Fonotaga. A o faafogafoga mai sui usufono mamalu i lo latou faiga mai i le tatou Fono, tulou, i sala le gagana o le upu tuusao. Ia, ua mafai e tatou ona vave mai a ua le mafai e a e isi sui usufono ona le vave mai i le Fono? A o le a la le fua pe a le atoa le numera e faatino ai le Fono a le Palemene? Ia, ua ou vaai atu o outou lava ia faipule laiti lea e tuai mai. E faapena le lagona, o le tautoga sa fai i le loto faamaoni. Ioe. E leaga le potopoto mai o Ofisa Sili o Pulega o Matagaluega ma Faalapopototoga a le Malo ia ae taunuu mai i inei e usu le tatou Fono ae toe tolo e le atoa le numera. O le mea lena o lea tatou te... ioe. Ou te faanoanoa

lava i le itu lea. Ioe. A o faafofoga mai outou ia e agai mai i le auala mo le tatou Fono lenei, ia, se i alolofa. Ae ia vave mai i le Fono, aua e tutusa lava le lē Fono ma le tuai mai i le Fono. Ia, e leai se aoga e faafofoga mai le tatou atunuu ua toe ta le tatou logo ua le oo se Fono, ona ua faataatia le Fono ona ua le atoa le numera e fai ai le tatou Fono. Ia, tasi lea itu tatou te matimati ai le mea o le faamaoni. E ui i lea, e faapena se lagona. Ia, o le tamaloa Nofaalii e Itaotemai, ia ae leai lava se aso e le o atoa ai le tatou numera. Ae na ona faamanatu atu i le paia o le tatou Palemene, ne i molia i le malu o le tai taeao se lagona. Ae alolofa e vave mai i le tatou Fono ina ia faapena ona saunoa faamalamalama le Minisita, a o lea tatou te i i uma lava i mea sa laga e a outou Afioga. E faapea foi sui usufono ua masani lava latou i le lē auai, ia se i alolofa e faamisi se isi mea o Vaega Faaupufai na tou te faanoi mai ai tou te o i ai, ae omai se i fai le tatou Fono na valaauina ai tatou ma maua ai tatou tupe.

Ia, o le matou fesoasoani atu lea i le saunoaga a le Afioga i le Palemia, ae tulai mai lau Afioga i le Minisita o Faalapotopotoga Tumaoti a le Malo aemaise foi le Leipa, ma le anoanoai o isi Matagaluega o lo o i lalo o lau vaaiga.

Tulai mai lau Afioga i le Minisita.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai atu i lau Afioga i le Fofoga Fetalai i le toe usuia o le tatou Fonotaga i le louloua o le tau. Faamalo le onosai. O lea ua maea ona tatalo faatasi le tatou Fonousu i le tatalo e silisili lava i lo tatalo uma, o le tatalo lea na aoao mai e le tatou Faaola ia tatou tatalo ai. Ua afifi uma lava i i mea uma lava tau tatalo. Ona ou manatu lea, ia, o le tatou faafetai, o le tatou viiga, ua atoatoa uma i totonu o le tatalo lea a lo tatou Alii e pei ona tatou faia nei i le taeao.

Faamalo atu i lau Afioga i le Fofoga Fetalai le onosai i tulaga foi o le tatou Fonotaga. O aso lava faapenei, o aso e louloua ai le tau, sousou le sami, emo uila, pa faititili, o aso ia e fia lauga ai Satupaitea, o sasa ia o le lauga a Satupaitea. Po o le lē omai foi o isi sui usufono ia lau Afioga, o la e ua fefefe o lea o le a lauga Satupaitea. Ia lava pea lou onosai, e omai lava.

Faafetai i le Afioga i le Palemia mo le faamalamalamaga o le tatou tali atu a le Kapeneta. Sa taumafai lava i ni auala ia malamalama le Maota nei, aemaise lava le atunuu o lo o faafogafoga mai. Aua o isi a tatou Fonotaga, ia pei na o le tali lava o se mataupu ona uma lea. E pei ona ou taumafai atu foi ananafi e faamalamalama nisi o mataupu i se tasi o Matagaluega, ona o le Matagaluega e aoga mo le atunuu atoa, ae i ai lava le lagona e le o lava le malamalama o nai o tatou tagata. O lona uiga, e le o atoatoa foi la le tautua a le Malo ma le tautua o lo o tuu atu. Ae a malamalama lelei o tatou tagata, ia atonu o le a maua se auaunaga mai Matagaluega uma a le Malo lea e galulue ai i matou nei.

Lau Afioga i le Fofoga Fetalai, e uma le aso ananafi ua oo atu lau tautalaga i le vaega lea o lo o pulea taaloga tau tupe a lo tatou Malo po o le Games Control Authority. O le vaega lenei o lo o faamoemoeina e le Malo ia latou mataituina taaloga nei tau tupe ua ofi mai i totonu. E le faapea o ni taaloga e leaga, e leai. So o se atunuu lava o atiae, e taumafai lava ina ia faamalieina muamua tagata. E le lakapi uma tagata, e le soka uma tagata, e eseese foi tulaga o le olaga e oo i ai ma le matua, ua ese foi taaloga e fiafia i ai. O lea foi la ua fai e le Malo ia foi taaloga e faataga atu ia i latou, a ia i ai se itutino latou te vaaia faalelei, aua ne i i ai ni amio foi lea solitulafono. Ia puipuia pea nai tagata o lo o fia taaalo lava latou ona o la e fia taaalo, ia i ai foi se mea e fiafia ai pe a uma galuega, ia ma maua ai seleni e fai ai atinae pei ona silafia. O lo o i ai suegatupe a aulotu, ia o lena ua atiae ai. O le Matagaluega la lenei, o latou tupe maua mai laisene ma tulaga faapena o taaloga, ia e toe faatino ai lava a latou galuega, faatino ai lea auaunaga. O isi la vaegatupe e faasafua atu i le atinae o tatou taaloga o lea e alu i ai tupe maua a le Matagaluega lea, atoa ai ma le ave i Matagaluega i le vaega foi lea mo Charitable Organisations lea e manaomia lava ni a latou tupe. Tasi la lea vaega e alu i ai tupe a le Matagaluega lenei, atoa ai ma le fesoasoani i aoaoga a le fanau, nai aiga e le tagolima. E tasi la ia mea e tatau ona malamalama ai o tatou tagata, aemaise lava i latou e oo atu i le ... tausaga i le iunivesite a ua le lava le faasoa, le tagolima foi le aiga, ae potu le tamaitiiti, lelei maka o le tamaitiiti, ua tatau ona alu ae faigata o lea ua faaletonu foi le tala i le tupe. O i la e tatau ona fesoasoani atu ai foi le Matagaluega lea, o tupe maua nei. E le faapea o... O nisi la tupe o totoe, e aumai i totonu o le Malo, e i ai le latou dividend e totogi. Afai o tou manatua pe ua 3 ea nei vaiaso talu ai na foi mai ai foi le \$300,000 a le Faalapotopotoga lea i totonu o le Tala o le Tupe a le Malo, ae o lo o togitogi pea nai isi a latou dividend i le tausaga atoa lenei. O le tulaga o le a i ai le vaega lea, o le a mei loa i le tulaga ese e le toe totogia ai ni a latou dividend mo le Beneficial Body ona e leai se tupe a le Malo o alu i ai e faagaoioi ai. A o lea e faaalu i i a latou tupe e pei ona ou laulau atu.

O le aofai la i le 5 tausaga talu ona ou tulai mai, o tupe na avatu i fesoasoani i tatou au taaalo ma taaloga taitasi, e \$907,000. O tupe na ave i Faalapotopotoga foi nei Charitable Organisations, e \$17,000. O tupe na alu e fesoasoani i aoaoga a le fanau, e \$76,372. O le aofaiga atoa o le fesoasoani a le Faalapotopotoga lenei, e \$1,000,422.00 i le tausaga lea na tea nei. Ia, o le aoga lena o lena Faalapotopotoga i totonu o le tatou Malo. Ia, o lo o i ai foi fuafuaga mo le lumanai, ia atili pea ona faaleleia le faatinoina ma le puipuia o taaloga pei foi o fafo i isi foi taaloga o lo o faia i na nuu. Ua i ai foi le fuafuaga e faatu se latou Ofisa, ua i ai le latou fanua i Savaii i talaane o le taulaga, e agai i ai le motu tele i Salafai i lo le tau o mai i inei e avatu ai latou pemitā ma tulaga faapena e faamalamalama. O lo o i ai le Ofisa i le taimi nei, a o la e ua lisi le latou fanua e galulue ai mo le lumanai.

Ia, lau Afioga i le Fofoga Fetalai, ona ou see mai ai lea i le tasi o Matagaluega...

Afioga Afoa Amituanai Faleulu Maui (Palauli Sisifo): Lau Afioga i le Fofoga Fetalai, e fia maua se avanoa faamolemole...

FOFOGA FETALAI: Malie lau Afioga i le Minisita, se i tulai mai lava le sui usufono mo Palauli Sisifo. Tulai mai lau Afioga Afoa.

Afioga Afoa Amituanai Faleulu Maui: Faafetai i lau Afioga i le Fofoga Fetalai. Leaga sa laga i lau lauga mea tau TV Bingo lea e i totonu o le matafaioi a le Minisita. O lea la ou te fia maua ai se avanoa ou te fia malamalama atili ai i le mataupu lea sa ou laga.

FOFOGA FETALAI: Ia, se i faapuupu mai le saunoaga.

Afioga Afoa Amituanai Faleulu Maui: Sa taua e le Minisita i le taimi o lauga le pese lava e tasi lea na pese ai Palauli Sisifo, o lea lava e pese ai. Ae sao lelei, e tasi lava le pese. Ae pei foi ona outou silafia, a e fiafia i se pese, ma e alofa ai se tagata i le pese, e te pese ai pea pese ai pea. O le agaga la lena na ala ai ona ou fia faamanatu atu i le Minisita, o le pese lea, e moni e tasi le fuaiupu e pese ai, ae ua lua fuaiupu - verses lea ua pese mai ai le Minisita. Muamua, e saolele lava le pesega lea, e manuia ai o tatou tagata i taaloga ia o TV Bingo. A o le agaga lea ou te alu atu ai, e puipui tatou fanau i le lumanai, ne i te i ua avea ma mea o gamblers e le lelei latou aoga foi nei, ona avea lea ma lape o le tatou Palemene i le fai o nei ituaiga taaloga faapea.

Ia ma le isi mea, o le pese lea ou te pese ai, e le se pese foi lea, aua o lea ua outou pepese mai nei e tele penefiti. Ioe. E tele penefiti, ma e aoga foi e puipui ai tatou fanau teine pei ona taua foi e lau uo ia Salausa.

FOFOGA FETALAI: Malo. O lea ua maua atu lou finagalo. Ia, se i tulai mai lava le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o mea nei o taaloga, e aafia ai faiga faavae lautetele a le Malo, o le ala lena o lea ou te fai ma ou tutu atu ai. A talanoa loa i le gamble, le mea lea o taaloga tau tupe, e i ai lava le ituaiga taaloga e faaaoga i ai le common sense, le faautautaga tatau. E ala ona ou taua le mea lea, ona i le taimi na amata ai taaloga ia, sa aumai ai le Tulafono e pasia i totonu i i o mea tau taaloga tau tupe. Mulimuli nei le Casino. Ae o le Tulafono lea na aumai i totonu e faataga ai taaloga tupe. E oo mai i le taimi lea, e leai lava se Tulafono faapea ua faia, a o le tele ia o taaloga tupe ia e fai nei. O le ala lena

e tuutuu loloto ai le tofa i mea nei. O le bingo, o le taaloga tupe, gambling. Afai lava la e te talanoa i mea tau gambling, ua tatau ona tapuni le bingo.

2. O le gambling, o le taaloga e tuu i ai le tupe i totonu a foi mai ua tele. Teu i le faletupe tasi lena gambling. Tau mai la ia te au pe i ai se Ekalesia ma se faifeau e le o teua ni ana tupe i totonu, aua e i ai le taimi e tala mai ai, ua le alu i luga ae ua alu i lalo. E oo lava ina tapuni bankrupt le bank. Ia ona a lea? Tago loa i le a? Tago i le fuamoa ua leai se mea. E oo i le taaloga o le piliati, o le taaloga tau tupe. O le pele suipi, e oo lava i le suipi, poka. A fai loa ni temu, o taaloga tau tupe.

Lau Afioga i le Fofoga Fetalai, a tatou talanoa loa i le mea lea o le taaloga tau tupe, e fai si lautele. E le mafai la ona e tago i le isi mea ae le tago i le isi mea. E oo foi la i le golf, le mea lea o le taaloga tapolo. Ua fia ni faifeau o la e taaalo tapolo a o la e gamble i luga o le malae tapolo e fai temu? Lau Afioga i le Fofoga Fetalai, e oo lava i le, tulou lava, e oo i le suega o lou toalua, o le gamble foi lena mea. E uma ane mea a le tou aiga ua e aumoe i ai, aumoe, ae a maua mai loa lou toalua ae sau le fafine, o le matua tele o le faaletonu, gau atoa lena gamble. O le olaga lenei, o le olaga o mea o taaloga faapea, a e alu atu lava ua e gau ua e gau, a e alu atu ua maua si au mea, ia, fiafia.

O le mea la lea, o le mataupu lenei, ua uma. Ou te fautuaina le sui usufono, malie ia, e te fiu lava e laga mai le bingo, ua uma ona avatu le tali, ma e leai se isi tali, o le tali faaiua lea ua uma ona avatu e le Minisita. Ae malie ia, se i faaauau le mea lea, e le afaina pe a na faapea o se mea e lautele atu, ae o le mea ua ou le iloa po ua faafia sefulu ona tali.

Afioga Afoa Amituanai Faleulu Maui: Lau Afioga i le Fofoga Fetalai...

FOFOGA FETALAI: Ia, malo faafetai. Ou te tapa lau Afioga i le Minisita... Se malie lau Afioga i le sui usufono mamalu, e leai se faafinauga, o lea ua faamalamalama, ua faamanino faafia, faafia, faafia. Ae malie oe le uso ua ta faamolemole atu, onosai ia i le tali lea a le Malo e faamalie ai lou finagalo. Ioe.

Afioga Afoa Amituanai Faleulu Maui: Lau Afioga i le Fofoga Fetalai, toe tasi lava si tamai mataupu lea i le vala lea ona maea ai loa lea ou te le toe taua mea tau bingo.

FOFOGA FETALAI: Ia, se... e a pe a e alofa ia o lea ua tali lava le Malo i me uma lava. O le faalavelave na o le tasi lava le mea lena e te taalo ai, se i taumafai e taalo i le isi mea ma le isi mea. Taumafai e piliati, ia pe pele suipi, ia pe mu foi foi. Ioe.

Afioga Afoa Amituanai Faleulu Mauli: Lau Afioga i le Fofoga Fetalai, e ese lava le vala lea ou te fia taumafai atu ai. Aumai sina minute se tasi e faauma atu ai ona ou le toe taua ai lea o le tatou mataupu lea.

FOFOGA FETALAI: Ia, se malie ia, malie ia, o le bingo lava o le bingo, o le ulupoo foi o le ulupoo se i vaeatu le paia o le Fono.

Ia se i tulai mai lau Afioga i le Minisita e faaaau mai le saunoaga.

Afioga Hon LAUTAFI FIO SELAFI PURCELL: Ona ou oo mai lea i le Matagaluega o Leipa lau Afioga. Tasi lenei o Matagaluega e lautele toe complicated e tele ana matafaioi, ae o le a ou taumafai pea e auiliili atu i ni gagana e tau malamalama ai le tatou atunuu lau Afioga, aemaise foi o le mamalu o sui usufono.

O le tausaga e 2019, faatoa oo atu ai tatou i totonu o se tasi o Faalapotopotoga a le lalolagi, e i ai ni vaega ia ua leva tatou te le i oo i ai, o lea ua avea ai nei i tatou ma sui. O le vaega lea o le Faalapotopotoga ua taua o le WIPO po o le faalapotopotoga a le lalolagi, e latou te mataituina ma puipuia intellectual property, po o meatotino tau le atamai. O lea la na taumafai taumafai lo tatou Malo, o lea ua tatou ofi atu i ai. Ma o se taumafaiga lelei aemaise le va o mea nei o fefaatauaiga ma le atinae o industries i totonu o se atunuu. O mea nei o meatotino tau le atamai, o mea ia e mafaufau i ai le tagata, ona tago lea e fau ma faatino. O mea nei e tatau ona puipuia. O lea la ua ofi atu tatou i totonu, e 4 lelei itutino o le Matagaluega tele lenei, o lea ua i ai tatou i totonu. E puipuia ai ia faiga fefaatauaiga, trademarks, i totonu o ni maka ia e puipuia ai ni mea a lo tatou atunuu o lo o fau i Samoa nei. Ia e amata mai lava i tua, po o se taumafaiga a le tagata i tua i lona aiga, ae tulai mai ai se taumafaiga e mafai ona faalautele atu ma faatau atu i fafo. O le tele o tulaga sa i ai lo tatou atunuu, ua tele a tatou mea faapenei ua mou atu. Ua ave i isi tagata ua tele ai a latou tupe. Ae mataulia o se galuega sa taumafai i ai se tagata i lona mafaufau ma lona atamai. O le mea lea e tau ai o meatotino tau le atamai. E i ai foi pese, e pei o pese le isi mea e mafai ona puipuia i lalo i i. O tatou elei, tulaga ua faapena, e i ai foi a tatou mea ua fausia i Samoa nei, e tatau ona puipuia. Ma o Tulafono la nei e puipuia ai. O le Tulafono lea e tau o le Hagueagreement, o le Lisbon, o le Patent, o le Madrid protocol, o mea nei e vaai uma ai i totonu ia le puipuia o tatou meatotino nei tau le atamai. E pei ona fai atu, e le i faigofie le tatou ofi atu, a o lea ua i tatou i totonu. O lona uiga ua faigofie ona lesitala ia mea nei a tatou tagata, ona puipuia lea i le Faalapotopotoga tele lenei a le lalolagi. E ova ma le selau ia nuu o lo o i ai i totonu. A lesitala loa ma fai le talosaga ia puipuia, ia ua puipuia atoa lava e nuu na. E le mafai ona faatauina e nisi, e le mafai ona faaoga e nisi o tatou igoa, po o a lava ni tulaga e tulai mai. O mea na, aua le faaleleia o fefaatauaiga ma le atili ai ona

puiipuia o tatou tagata ia latou gaioiga o lo o taumafai i ai. Ina ia maua le tamaoaiga mo le tatou atunuu.

O le isi vaega o lo o tele i ai le galuega a le Matagaluega lenei, o tatou galuega faavaitaimi, po o le Seasonal Work. Mo le silafia....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E taua tele le mataupu lea ua laga o le aseta ia a tatou tagata faalemafaufau. E aofia ai foi ma mea tatou te gaosia i Samoa nei, ia aua ne i gaioia e se isi atunuu. O le faataitaiga taua lava, o le faataitaiga o le oloa lea o le peepee ma le luau. Ua tele ia taumafaiga a atunuu ina ia tuuapa le peepee, ia oo ifo i le taimi e faaaoga ai. O la lava e fou e pei faatoa tatau mai i le popo. Ua leva la ona fai a tatou suesuega i le laboratory i Alafua, sa faatino la e le saienitisi e igoa ia Betrana. O lea foi la sa gaosi mai ai ma le tatou fagu lea o le tomato sauce feu. Ua leva ona taumafai i ai isi atunuu, e tuuapa le peepee ia maua pea le fou. E pei lava o lea e faatoa tatala mai, pe fia masina ae tatala atu loa, aumai e pei lava faatoa tatau mai i le popo. Ona maua loa lea e Betrana o le saienitisi lea a tatou, ia suesuega. Ma tuuapa loa, o le tele o le seleni na maua mai ai e le tatou kamupani lea sa faaaluu atu ai mea ia, o lea sa i i, i Taufusi. O le tele o le popo ma le tele o le apa peepee na alu i Ausetalia, alumia, alu i Niu Sila, a o lea e tusi ai le upu peepee. O le mea la ua tupu, ua tele ina le toe taulia ai peepee mai Filipaina mai Asia, Thailand. A ua alumia le peepee lea a Samoa, ae tusi ai la le upu peepee. Ua te i lava le tatou kamupani lea, ua alu atu, ua gaioi e kamupani i fafo, le upu lea peepee. O le upu o le upu a Samoa, ae ua sau le apa mai Filipaina, peepee, sau le apa mai Thailand, peepee, ma isi atunuu o Asia, ua tasi lava le upu lea ua faaaoga, peepee. Ona o le upu lea peepee o le upu Samoa lea e igoa ai le apa lea. Ae na o le pau lava lea o le apa, o lea e alu atu le peepee e felesi, ona o le formula lea ua faaaoga e le saienitisi lea, a o le faalavelave foi la, ua publish, ua faasalalau le formula, ae le i i ai la se... e le i tuuina la faale-Tulafono i totonu. E pei o le mea lea na saunoa i ai le Afioga i le Minisita. Ia gaioi loa e atunuu i fafo, o le a la le mea lea ua i ai? O lea la ua tapuni le tatou fale peepee. Ae a na faapea e fai le mea lenei, e puiipuia le oloa lea. O le oloa e afua atu i le mafaufau, o lea ua aveia o le aseta a Samoa. E meamanu ua faapenei, e leai lava ni peepee a nisi atunuu. A o lea la ua latou faaaogaina le formula lea ua faasalalau toe faaaoga le upu peepee a Samoa. O la la ua peepeea uma ai ia faleoloa i Niu Sila, faapea foi ma Ausetalia ma isi atunuu, ae ua le taulia ai ma le tatou peepee. O lea la ua ese le vaega lea ua latou taumafaiga nei. O lea la ua toe taumafai atu tatou, ae ua fai lava si faatamala i lenei taimi. O lea ou te talanoa atu i le va o le 1970 i le 1975, tatou faatamala tele, ona e le i patent ina e tatou, e le i faamaufaailogaina ia le aseta lea po o le meatotino lea faale-mafaufau, o le meatotino a Samoa.

FOFOGA FETALAI: Ia malo faafetai, faafetai ua manino foi le faafofoga mai a le atunuu, o le faatamala lava foi i lenei vaitaimi. Ae faafetai o lea ua maua le avanoa ua fai ai Tulafono e puipuia ai meatotino tau le atamai i si o tatou atunuu. Ia malo faafetai i le Kapeneta ma lau Afioga i le Palemia. Tulai mai le Afioga i le Minisita.

Afioga Hon LAUTAFI FIO SELAFI PURCELL: Ia faafetai. Ia faafetai i le Afioga i le Palemia mo le faalauteleina o mataupu ia. O le mea tonu lava lea sa taumafai e faamalamalama atu, o lea ua i ai Tulafono e puipuia ai a tatou meatotino ma le ave faagaoui, o le upu lava e tuusao atu, e isi atunuu tetele e i ai a latou tupe.

Ona ou see mai ai lea i le isi vaega tele a le Matagaluega lenei, o tatou galuega faavaitaimi. Atonu e le na ma le laina le silafia o le atunuu atoa lava, i le aoga tele o lenei polokalame a lo tatou Malo. Sa lauga foi i ai nisi o sui usufono i le atiae o latou itumalo, talu ona faamanuiaina alo ma fanau e o i galuega nei. Mo le silafia e le tatou atunuu e 5 ia ituaiga galuega nei o lo o aafia i lalo o galuega faavaitaimi. O lea e i lalo o le faamalu o galuega faavaitaimi. E 3 la Niu Sila ae 2 Ausetalia. O Niu Sila o lea e i ai le vaega lea e o e tau le apu, RSE, aofia ai ma le vaega lea ua i ai nei le au fasimanu. O le au fasimanu lea ua fai si umi o galulue. Ma le vaega lea ua aafia ai foi le aukamuta, ua au o latou tomai e o ai i Niu Sila. Ma o se galuega na amata mai le vaega lea e i ai le aukamuta, i le taimi na aafia ai le toe fausia o le nuu lea o Karaisitete. Sa saunoa foi i ai le Afioga i le Palemia i le isi foi taimi. O la la e faigaluega ai o tatou tagata uma nei e 3. O le au tau apu, lea e tau faalautele ai, o le au fasimanu ua ova i le 300, ma le aukamuta. O le aukamuta la lenei, e pei foi ona taua muamua e galulue i o, o le auga o le faamoemoe ia omai i Samoa, e toe foi mai, ma aumai le tomai lea. Aua o le taimi lea e faigaluega ai o, o la e totogi, e pei lava latou o tagata Niu Sila. Ma fai aoaoga ina ia o mai ma ausia tomai maualuluga o la e galulue ai, quality of work. Ina ia foi mai, ona o mai lea ma aumai ia tomai e aoao ai foi lea o isi tatou alo ma fanau, ina ia siisii ai i luga lea tulaga o le fausia o fale, tulaga uma faapena. O le vaega lea i Ausetalia, o lea e i ai le vaega masani lava, e pei o le seasonal work, ae ese le tauga o latou. O lea foi e o e faigaluega i faatoaga, ma tulaga faapena.

E i ai ma le Pacific Labour Scheme, o lea e o ai tagata e ese mai ma le au tauapu, mo se taimi e 3 tausaga. E galulue ai i faletalimalo, galulue i isi galuega faapena, mo se taimi e tau umi. Ae o lo o galulue foi lava i lalo o aiaiga a le Malo o Ausetalia. E leai se faapea e laiti totogi e avatu ai, e leai, o tagata ia o lo o faigaluega lava e tutusa lelei totogi, tutusa lelei aiaiga, conditions o faigaluega, e pei lava o tagata Ausetalia. O le taumafaiga ia maua foi se tomai o nai tagata e o ai foi ona toe o mai lea. O le 5 la lenei o matata, o isi vaega ia e i Ausetalai, o lava e taumafai, e pei o le Pacific Labour Scheme. A o se galuega lelei ma se taumafaiga e sili ona lelei, pe a

oo i le taimi e gaoioi ai atoatoa. E oo lava i le taimi o le a amata lelei, ae oso mai ia le faamai. E pei ua fetuu ai le faiga o le vaega lea, o le Pacific Labour Scheme, ae o lo o galulue pea le vaega masani i le faigaluega i faatoaga. O le tausaga na tea nei lau Afioga, e 3,400 o tatou tagata sa galulue i galuega nei. O le 3,400 o se numera toatele, o atu omai, e tusa o le vai-numera lea sa o tatou tilotilo i ai. O le tausaga i tua atu, e 3,300, tua atu e 2,500, o lona uiga o lo o tuputupu pea i luga nei avanoa mo a tatou fanau. O le galuega foi lenei a le Malo o lo o fai, i le va ma isi Ausetalia ma Niu Sila, taumafai lava ina ia tuu mai avanoa ia i tatou. I le va o le Taitai o le Malo ma Taitai o Ausetalia ma Niu Sila, o le va foi faa-Minisita, le va faa-officials, o la e talanoa i taimi uma. O le auga lava ia tuu mai avanoa mo i tatou. O le seleni e tilotilo i ai lau Afioga ua maua mai i tausaga faale-tupe i galuega nei, tausaga faale-tupe 2019/2020. E ova i le \$200 miliona lau Afioga, \$210,662,180, i le tausaga faale-tupe lea ua tea. O le tausaga i tua atu, e sili atu i lo le \$190 miliona. O tua atu, e sili atu i lo le \$140 miliona, o tupe la nei o lea ua maua mai a lo tatou atunuu. O tupe o lea ua alu sao lava i nuu ma alalafaga, aiga o latou nei. O se faamanuiaga matautia lenei, i lou tulaga faa-Minisita, o se faamanuiaga matautia ua maua e Samoa. Ae faamoemoe nei mea uma i le faamaoni o itu uma lava o lo o galulue i totonu o le scheme lenei. E mai lava i alii ma faipule, o lo o latou tuuina mai alo ma fanau, ma latou tautino mai o tagata lelei tagata nei. O a lava vaega o lo o malaga, aumai tamaiti lelei, o le tatou filifiliga foi o i latou, ina ia fai le meatonu. Pe o atu foi i Niu Sila, o lo o i ai a tatou sooupu. O ia e fesootai ma i latou nei, ina ia mautinoa o tagata nei e sili atu ona lelei ua tatou avatua. O la foi e tuu mai le faatuatuaga a i latou o le a faigaluega ai ia alo ma fanau ia a tatou. O le mea lea ua tulai mai, ua matua faatuatuaina Samoa. Ua sili atu lava le faatuatuaina o Samoa e i latou e ana galuega faavaitaimi nei. Ua sili atu lo latou faatuatua o Samoa, na i lo nisi lava atunuu. Lau Afioga i le Fofoga Fetalai, e le na o tatou lea e o i totonu i le taumafaiga lenei o le scheme. O la e i ai Toga, o la e i ai Fiti, o la e i ai Vanuatu, o la e i ai Papua, o la e i ai Solomona. O lea la tatou te tauva i numera nei.

I le tulai mai o le faamai lau Afioga, na aafia tele ai le faagaoioiga o le scheme. Ona ua faigata ona feoai, ua faigata ona faagaoioi lava i le faiga sa fai ai, omai isi o atu isi, omai isi o atu isi. Ae peitai ane, ona o le lelei o le va-fealoai o Samoa, Niu Sila ma Ausetalia o lea lava na toe faaopoopo ai taimi. Na faaopoopo le 6 masina, i le uma lena o latou visa sa o ai, o le va-fealoai la lea, o lea ua faagaoioi ai loa i le taimi na tulai mai ai le faamai. Na taumafai foi lo tatou atunuu e aumai o tatou tagata ae ua faigata foi, aua e aumai faanofo vaavaaia foi. I le taimi la lenei i le toe tau faaolaola o le tatou galuega lenei, ua faafaigata foi i Niu Sila ia. Ua faafaigata e Niu Sila, aisea? Ua toatele foi tagata Niu Sila o lea ua aafia a latou galuega i le tulai mai o le Koviti-19, ua toatele naua. O lea foi la ua tilotilo Niu Sila ia, i se faiga e faafaigaluega ai o latou tagata. Ua faaititia ai avanoa mo i latou e o atu i le

Pasefika. O lea ua tuu mai le numera a Niu Sila e 2,000 mo le taimi lenei. A o lo o taumafai lava tatou i se numera e sili atu. O le faiga la lea ua manuia ai Samoa, a fuafua mai la i nuu ia sa ou fai atu ai, e toa-ono nuu, vaevae i ai le 2,000 lea o lea o le a o atu. Ua lata nei i le 1,000 tagata faigaluega o lea e manaomia mai e i latou e ana galuega, e o atu i Samoa. O lea la ua toeitiiti oo i le afa o le numera lena o lea ua maua e Samoa. Ae vaevae le isi 1,000 i le isi vaega lea. O le mau faailoga lena, o le lelei ona faatino e Samoa le scheme lea.

O le lelei o tagata faigaluega, o la ua faatuatuaina. O le taimi lenei e le o toe manaomia ni tagata e o, e paie, se i tulou. O tagata e o atu tau faasino, tau faasino ae le fia iloa le faiga o le galuega. O le tagata na ona alu atu lava, o tagata foi nei, o tagata na o lea e lelei o latou aiga. E iloa lava le taulealea ia e lelei, e alu atu foi i o e lelei. Ae o le taulealea foi lea e... e alu atu foi i o e taufaasino, e uma loa, sau loa nofo i Samoa e le toe alu. O le taumafaiga lea e i ai, e na o tagata lelei lava e o. Ae le toe tuua ai le avanoa e o atu ai foi ma nai isi tagata fou, ina ia mafai foi ona maua e isi faamanuiaga. O le taimi lenei, e pei o le puipuiga lena a Niu Sila, ia avatu tagata, e le toe alu se taimi e tau aoao ai. Ona ua tele ia, tulou lava, ua tele le apu, tele le pea, a ua manaomia tagata e o atu e tau. O lo o taumafai foi Niu Sila ia i le latou pitolaau, e ave muamua le avanoa i latou foi tagata. E le faitio foi se isi, o la foi e toatele o latou tagata e le o faigaluega. A o le tulaga lena ua i ai ia le taimi lenei, o lo o taumafai foi lo tatou Malo, e faafoi mai i latou la ua uma lo latou taimi. Ae o le faafaigata lena, aua e o i Niu Sila, o atu totogi le 2 vaiaso, toe omai e 2 vaiaso e nofo vaavaaia ai. O lo o taumafai lava le Malo i se faiga, e faataugofie ai ma faafaigofie ona toe faafoi mai o tatou alo ma fanau. O la sa i fafo, ma ua uma o latou visa, ma ua toe faaopoopo toe faaopoopo, ma ua oo lava i le taimi, ua tataua loa ona faafoi mai i latou.

Lau Afioga o nisi o...

FOFOGA FETALAI: Ia malie lau Afioga, e taua tele lau saunoaga, o lea ua tulai mai sui, o le faauilavea. Ia tuu atu ia le avanoa i le Afioga ia Olo, le sui usufono mo Salega Sasae.

Tofa Olo Fiti Afoa Vaai (Salega Sasae): Ia faafetai i lau Afioga i le Fofoga Fetalai, e faatalofa atu foi i lau Afioga, le Palemia, ma le Palemene i lenei taeao. Ae faapea foi le fua faalepa o le tapuaiga a si o tatou atunuu. E faafetai atu lava i le Afioga i le Minisita. E na o le 2 lava na i mataupu e fia maua ai se faamaninoga mai le Minisita. O le mea muamua lava ou te molimau atu i le saunoaga a le Afioga i le Minisita, ona sa ou vaai ai, o tauapu mai le Minisita i lona ata manaia, ma si vaega le la. Ou te faamaonia la tulaga o lo o saunoa i ai le Minisita. A o si vaega ia e 2 lau Afioga i le Fofoga Fetalai. E i ai lava si mataupu lea sa faafofoga foi lo tatou atunuu, i se tasi sa mai, o lea sa saunoa i ai le Afioga i le Minisita. E pe na iloa lava e

le alo foi, o la e mai, i le tulaga la o lau matau atu. E pei e foliga e afua atu i inei ia le tapenaga o pepa ma mea faapena. O mea ia o medical checks, na o se tuualalo lava i tulaga faapea. Ona e tulai mai ai foi ni feeseeseaiga faapea i aiga, aemaise le tatou Faigamalo. O lona 2 lau Afioga i le Fofoga Fetalai, E pe o i ai ni insurance a tagata faigaluega ia? A o ai foi e responsible i insurance a tagata o le tatou Malo, po o le kamupani o le a o atu e faigaluega ai. Ina ia puipuia lava o tatou tagata, a o le atinae lau Afioga i le Fofoga Fetalai, faafetai i le Afioga i le Minisita. Ia faafetai mo lea atinae taua. Ma le faaaloalo.

FOFOGA FETALAI: Ia malo faafetai, se i tuu mai le avanoa ia Palauli le Falefa. O le a faasolo ona tali mai lea o le Minisita. Lau Afioga Faumuina Tiatia Liuga.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, faafetai mo le avanoa. Ona o le mataupu lea sa ou laga lea ua saunoa i ai le Minisita, si ou uso a Minisita. E to lou pulou Lautafi i galuega ua e faatino. E tasi lenei o atinae a le Malo, o lea e fesoasoani tele i nai alo ma fanau, ua le o oo i luga i tulaga faa-Iunivesite a latou aoaoga. Ona ua le mafai e le malosi o le mafaufau ona faaauau, faafetai tele mo le polokalame. E tasi lenei o polokalame o le taua ia, o le mea foi lenei sa ou laga ai. E leaga e taua le vaega lea, lea e fuafua e le Malo mo tupulaga e fai mai, ma le atinaeina o tatou aiga. E na o le 2 lava au tuualalo Lautafi. E muamua, o lea sa ou laga le tulaga o penisiona, voluntary contribution. Ma o lea ou te iloa ua taumafai pea le Matagaluega i lalo o lau taitaiga, e amata ai ona togitogi penisiona a na i alo ma fanau, e tua i ai i taimi e afaina ai lo latou galuega faaauau i Niu Sila. O le mea sa ou laga ai le vaega lea o le penisiona, o tagata e totogi e le o ni tagata e faigaluega i Samoa nei. Ona e ese ia faamanuiaga o vaega ia, ese faamanuiaga o tagata faigaluega, o lea e totogi a latou saofaga. O lea foi na lavea atu ai, le au faifaatoaga, o le au faifaiva, ma tagata foi o lo o faatau a latou meatotino i le maketi ma isi vaega.

O lona lua o lau tuualalo, o le taua ia o le tupe lea e maua mai. Ou te iloa pe ua fai sina, pe ua faa-lua pe ua faa-tolu ona ou laga le mataupu lea i talanoaga i fonotaga faava-o-Malo, o le exchange spread. O le vavamamao o le tau e te faatauina ai le \$ ma le tau e toe faatau atu ai e le faletupe ia te oe ia le \$ lava lea e tasi. Sa masani ona ou talanoa i fonotaga, e le gata...

FOFOGA FETALAI: Ona o lea o le a e toe saunoa lautele, e le o ni faauilavea ni tuualalo. E na o le mea e fia faasao ma fia faamalamalama.

Afioga Hon Faumuina Tiatia Faaolatane Liuga: O le tuualalo. O lea o le a faauma le tuualalo. E te silasila ai i le exchange spread, ina ia aumai i

luga le aoga o le \$. E le gata e aoga i le RSE program, ae aoga mo tatou tagata o la e i fafo o lea e lafo mai tupe. Ma lou faaaloalo lau Afioga.

FOFOGA FETALAI: Se i faasolo atu pea, a matau mai lava e le Minisita, o mea lava sa lavea i saunoaga a sui usufono, ona faamalamalama lea. Ae o mea e le i lavea i latou saunoaga, aua le maumaua fua lou taimi. Ae se i vagana ua e manatu e faamalamalama i le tulaga lautele, ona faatoa e tali faamalamalama lea i ai. O lea o le a faasolo atu le au faauilavea. Ia se i tulai mai le isi sui usufono mo Falealili.

Tofa Aumua Isaia Lameko (Falealili Sisifo): Faafetai i lau Afioga i le Fofoga Fetalai mo le avanoa. O sina mea lava e fia maua i ai sina malamalamaaga. O le tatou polokalame lea o le RSE, e tusa a fua i ai, ua 14 nei tausaga talu ona fai e le tatou Malo. Ia faafetai foi i le Malo, i le amata mai i le tausaga e 2007, e oo mai i le tausaga lenei, i le polokalame lea o le RSE. O le mea lea ou te fia malamalama ai, i le vaevaega o le 2,000 lea na aumai, aua o lea sa taua e lau Afioga i le Minisita E 6 nuu ia sa ave foi i ai le avanoa e vaevae i ai o tatou tagata. Ae peitai ane, e i ai nisi o nuu ua i ai le tulaga e pei ua tetee mai i le Malo e fua agai i le tatou polokalame lea o le RSE. Ae pe fia la pasene e vaevae agai i ai i nuu ia, ma le vaega o le pasene lea. Ou te talitonu, o le tatou Matagaluega lea ua i ai le vaega lea ua taua o le Export of Workers i le tatou Matagaluega o Pisinisi ma Alamanuia. Ae pe fia la le pasene ua tuu atoa i i. O lau tuualalo ma lau fautuaga, e manaia, a faapea ua tetee nisi o nuu i le polokalame lea a le tatou Malo, e manaia ae faasee mai i le tatou Matagaluega e faasoa ai. Ma le agaga faaaloalo.

FOFOGA FETALAI: Malo. Se i tulai mai le sui usufono mo Anoamaa Sasae lau Susuga Lufilufi.

Afioga Alaiasa Muagututi'a Moefaauouo Malagaitutogiai Sepulona Moananu (Anoamaa Sasae): Faafetai i le avanoa i lau Afioga i le Fofoga Fetalai. Faafetai foi i le alofa o le Atua i lenei taeao ua tatou feiloai i magafetausoifua e pei o le upu i le Tamaitai o le Alataua.

A o le mea sa ou taua i lau lauga le tatou scheme lea, sa momoli ai foi se agaga faafetai foi lea i alo ma fanau. A o le taimi la lea ou te le i maua faamaumauga nei lea sa tolaulau mai e le Afioga i le Minisita, \$210 miliona, 3,300 le aufaigaluega. O lea la tatou te vaavaai i le \$60,000+ le average lea a le tagata i le faamanuiaga lea pe afai o numera ia. O le mea lea e matua momoli ai lava le agaga faafetai. Po o le \$40,000 Niu Sila lena. O lona uiga e faatulai pea le... Na pau lava si au fautuaga i le Minisita ma lana Matagaluega, na pau lava le mea lea ou te tilotilo i ai, o le vaivai o le tulaga foi lea o le faasoaina o tupe e tagata nei. E 2 lava 3 vaiaso feoi loa ua leai se mea. Ua tatau lava ona fai sina... faatulai a le Matagaluega sina aoaoga

foi lea, financial management si mea laitiiti lava a ia iloa e tagata nei faasoa le mea ma faaaoga le tupe e tatau ona lelei mo aiga. Leaga e sau loa mai fafo pipii loa i ai... ia manatua foi tama sese a tatou, ia le pipiiga lena, e uma ifo onana faasoloatoa lea e tutupu ai faalavelave. Na tupu ai foi le faalavelave i totonu o le... ma maliliu ai.

Ia avea foi lenei avanoa lau Afioga e avatu ai vaimalu i lau Afioga ona o lau saunoaga i le taeao e tusa ai foi ma sui usufono mamalu o le Maota. Sa ou fia tulai atu lava i lau... ae moni a au, leaga e tasi lava le lagomate se i tulou, e faaleaga ai le suauu manogi ma tulaga faapena. Ae faafetai o lea ua amata ona vavevave mai le aualii ia, o lea sa tuai mai i le tatou Fono.

Ia manuia le alo atu o lau Afioga ae faafetai tele i le Minisita, o lea ua maua le fuainumera lea sa le i mafai ona maua i le taimi na fai ai matou lauga. Ia manuia le tatou Fono.

FOFOGA FETALAI: Faafetai. Faafetai lava i lau Afioga i le sui usufono mamalu o saunoa. Ia se i saunoa muamua ia le Afioga i le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Faafetai lava i lau Afioga. Afai foi e tele ni finagalo faaalua i le vaega lenei, e taua tele. E taua tele i faamaumauga a le Pasefika atoa ma atunuu tutoatasi i le faamanuiaina o le Pasefika i le mea lenei ua faatinoina. O le tupe taua lenei, ma a vaai i ai, o le tausaga ese le tausaga lenei agai mai i le 2019, 2020 i le faateleina o tupe faamomoli mai fafo i le atiaaina o aiga ma nuu, e aoga tele ai. E ave foi le tuualalo ma fautuaga i le Malo i lenei vaega taua, aemaise lava o tatou lea ua pito sili ona tele tagata e avatu ai. Sa fai lau lauga i le laugatogi a Faleata lea sa fai i le faaiuga o le tausaga na uma atu nei, sa ou faamalosi fanau, vaai outou, e le o omai atunuu ia i fafo avatu ni loia ma ni mea faapena, o lea e omai avatu tagata fai fale, fai eletise, fai palama. O le mea lena e tatau ona outou toaaga e o e vaavaai.

O le mea la lena o le fautuaga i le Afioga i le Minisita i nisi trades ia, o lea ua agai i ai tatou e upgrade ma e tele tele le manaomia foi o tomai faapitoa nei e ave i fafo e fesoasoani ai i tatou aiga, ina ia le gata o le aufaifaatoaga, a o mea o skills faapitoa ia. A o le mea la lea na ou taua i lau lauga lau Afioga, o le tele o latou ia ua toe foi mai, po o a polokalame ia ua faataatia e le tatou Matagaluega foi lea e faaaoga ai o latou tomai ia e foi mai ma latou ma toe tapena ai foi e toe o. I lo le omai o la e ua... e oo i faifaatoaga, e moni ua tele lo latou silafia i le faatinoina o mea nei, ina ia faaaoga ai pea a ua foi mai ma ia tomai faapitoa. Faafetai lava.

FOFOGA FETALAI: Malo. Malie lava. Ia, se i tulai mai le Taitaifono o le Komiti o Tupe lau Afioga Aliimalemanu.

Afioga Aliimalemanu Alofa Tuuau (Alataua Sisifo): Faafetai mo le avanoa. O lea sa taua i sa matou lauga le tulaga lea i galuega faavaitaimi, a o lea ua oo tonu lava le mataupu lea i penisiona ae sa na ona faaata atu o se manatu, a o lea ua oo tonu lava i le tulaga lea o penisione i mea o voluntary contributions po o latou saofaga ia tuu i ai le faitalia. Ona o le tulaga lea e i ai, ua taua loa penisiona, ona o le talaiga lea e alu nei i mea nei o penisiona lea e faapea ina ne i aveseseina ai le atunuu, lea e faapea e tatau ona toe sii i luga, o lea e tele tupe a le NPF.

A o le mea la lea ou te tu atu e faamalamalama, o penisiona lea e totogi nei mo tagata matutua na misi i lau lauga o tupe e avatu i le Tala Faatatau o Tupe a le Malo lea e avatu ai le \$27 miliona, lea e faatupe ai le totogiina o penisiona ia a tagata matutua faapea le feoai i luga o vaa. O tupe ia a le NPF ne i mix up ne i fesopoai ona faapea lea o i tonu lea, leai. O lea e maua nei i le saunoaga lea i i pe a faapea e fai saofaga mo a tatou fanau nei e o i fafo faavaitaimi, o tupe na e ave i le NPF, o tupe lava na a le aufaisaofaga ia a le NPF, lea sa saunoa ai se tasi o sui usuofno i le manaia o le tulaga ua i ai tupe a le NPF. O tupe lava na ia a le aufaisaofaga a le NPF. E fia faamalamlama ne i sese ai faapea o i ina e sau ai tupe ia e tatau ona ave ai penisiona mo tagata matutua. Ma le faaaloalo lau Afioga i le Fofoga Fetalai.

FOFOGA FETALAI: Malo. Manaia le faamalamalamaga a lau Afioga i le Taitaifono.

Ia, masalo toe tasi lava le faauilavea, malie lau Afioga i le Minisita, ona e saunoa loa lea... Ia se i tulai mai le sui usufono matua o Falealili lau Afioga Fuimaono.

Afioga Fuimaono Teo Samuelu Teo (Falealili Sasae): Masalo ai ona o le taua o lenei mataupu e ala ai ona lagalaga foi finagalo o sui usufono mamalu. Ae o le tulaga foi lele, pau lava lau tulaga e fia manino ma faamalamalama, ona o le tulaga lea i le filifiliina o tatou tagata. O lea ua saunoa le Afioga i le Minisita, o le toatele o i latou nei, ua o tai-faafitu tai-faavalu. E sao lelei lava, ua ou molimauina lena vaega. E le fesiligia le tamaoaiga ma le atinae ua tupu talu mai le polokalama lea. Ou te molimau foi au i le matou itumalo i le tele o atinae lelei o lo o faatino ai. Peitai, e i ai foi vaega e toe silasila i ai, aua e i ai polokalama nei e o i ai i latou nei e faasauniuni, toetoe lava atoa le tausaga o o e faatino e faia galuega, ae le o o i o e faatino galuega e maua ai seleni, ae o lea lava e faatino ae uma ifo, e le lavea i le lisi o tagata e o. A o lea lava e pologa e usu, usu, usu, e faatino nisi galuega a i latou foi o lo o faafoeina le polokalama lenei.

Ia ma le isi itu, pe le tagai ina ia mafai ona tutusa lelei nei faamanuiaga i itumalo, ina ia mafai ona faasafua tutusa lelei faamanuiaga nei. Afai lava e tai 10 a le itumalo pe tai 20, a ia manuia lautele, aua o le upu moni lava, masalo pe tasi lava pe 3 ni nai nuu o lea e manuia ai i le mataupu lenei. Ia a

o le tele lava o nuu, o la e lava e matamata i le polokalama manaia lenei. Ia pei o le vaega lenei e fia faamanino atu, a o lau autilotilo, o le manaia ia ae foi mai i le tatou Matagaluega po o le Malo e faasoaina le vaega lea. Ioe. Aua foi le faatuatua tele i latou i tua, aua e solomua ia i latou nei i tua e faafoeina mataupu nei ona tetee i polokalama a le Malo.

Ia, ona pipii atu ai lea ma lau faaaliga e le paoina le saunoaga a lau Afioga i le Nofoa, i le taimi ua sola ma le itula ua fano sa e saunoa ai, e solomua i sui usufono fou le tuai mai. Ia a e tagai mai i le Itu Agai lenei, o matou lava nei e vavevave mai i taeao i Fono uma lava. Ae solomua i... leaga e ese le Itu Agai lea ma te i ai, ese le Itu a le Malo ma le Itu Tetee. A o le Itu Tetee la ia e i ai sui usufono matutua, e le omai i ni Fono toe tuai mai. Ia ma le agaga faaloalo.

FOFOGA FETALAI: Ia malie lava lau Afioga i le Palemia se i tuu atu lava le avanoa i le sui usufono lea... Le sui usufono tetee, o le a le sao o le saunoaga a Falealili?

Tofa Olo Fiti Afoa Vaai: Lau Afioga i le Fofoga Fetalai, e faamalulu atu i le Afioga i le sui usufono mamalu, e leai se mea e tau o se Itu Tetee i i, o sui usufono lava e agaia le Malo. Ma a tuai mai foi, ia leaga ua matou matutua i le sui usufono lea sa talanoa mai.

Afioga Fuimaono Teo Samuelu Teo: Lau Afioga i le Fofoga Fetalai, o le ala tonu lava lenei e ala ai ona ou fai atu, o sui usufono tetee, aua foi o lea e Fono le Fonousu a Samoa ae tetee ai, o fai latou polokalama ae tiai le Fono na ala ai ona valaaulia. E moni lava e tuai, ae le o faasagatonu lelei le tulaga o taoto ai tatou Tulafono.

FOFOGA FETALAI: Malo. Se malie ia o lenei foi o le a e fai mea ita faatoa e sau i le Fono.

Tofa Olo Fiti Afoa Vaai: Soia ia tou te atugalu i polokalame a le FAST. O le mea lenei ou te iloa ai ua tou popole, tuu pea le FAST e fai le latou faalauiloa, a o lea foi e fai atu le tou faalauiloa i le tatou Fono.

FOFOGA FETALAI: Ia, malo ia outou. Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga e aoga foi mea tutupu e atili malamalama ai. O le Fono lenei, e le o se faalauiloa, o le Fonousu a le Palemene ua uma ona faatulafonoina, e omai ai tagata e faamaoni i a latou tautoga lea sa fai i luga o le Tusi Paia. A o e lava e tiaia

Fono ma o tafafaovale, o i latou tonu na lea e agai i ai le saunoaga a le sui usufono mo Falealili Sasae.

Lau Afioga i le Fofoga Fetalai, e taua tele le vaega lea ua oo mai i ai le saunoaga a le Minisita, aemaise lava le tulaga lea i maliega ua uma ona faataoto i le va o le Malo ae faapea foi ma le Malo o Niu Sila, tainane foi le Malo o Ausetalia. O le taua o itu ia, ona o faatalanoaga o le fesoasoani lenei, na umi lava o fai se talanoaga faatoa faatino loa. I le faagasologa o le faatinoga o le polokalame, e i ai lava nai suiga e fai mai lea taimi i lea taimi. O vaega tetele la ia na saunoa i ai le Minisita i le gauai mai o le aufaifaatoaga lea i Niu Sila faapea foi ma le Malo ia Samoa. E i ai mafuaaga tetele lava. E le gata la i le galulue malosi o tatou tagata e o atu, ae i ai foi isi mafuaaga.

O le aso ananafi i le ta o le 4:00, sa ma talanoa ai ma le Minisita o le Va i Fafu a Niu Sila sa fesootai mai e faatatau i le mataupu lea o le Koviti ma ituaiga fesoasoani e lagolago mai ai Niu Sila. Ae le gata i lena o mataupu tau le fesuaiga lea e tulai mai nei i totonu o le maopoopoga o Malo o Taitai o le Pasefika. Ma le vaega la lea o tatou tagata le RSE, tagata e o atu e galulue i Niu Sila. O avanoa faapenei, e oo loa ina talanoa, e oooo lava i ooooga, ia, ma molimoli ai foi le tatou faafetai. O le tasi lea mea e taua tele. E tele atunuu e popoto e fai le faamolemole ae le iloa fai le faafetai. E matua le iloa lava fai le faafetai. O Samoa, e lelei tele i le mea o le faamolemole, ae sili atu la ona leotele le faafetai, e fiafia ai loto o i latou foi e aumai pea aumai pea aumai pea fesoasoani, ona o Malo la e latou te iloa le amanaia e le Malo o Samoa le latou fesoasoani o lo o aumai. O le ala foi la lena a outou faalogologo i le tolaulau atu a le Minisita, e fai lava si tetele o fuainumera ia e sau, ia ona tuu atu loa lea i isi Malo, ia lena, ua le toatele tagata e maua e latou. A o tua atu la o mea ia, e i ai isi mea malolosi ia e afua atu iinei.

Muamua, o le Zero Tolerance Policy. O le faiga faavae lea, e matua le talia lava e le Malo se tagata faaletonu. Na ona faaletonu lava fai loa i ai ma le faaiuga. O le itu muamua lena. Mai lava i le amataga, e i ai isi e o atu sosola, ae matua malosi lava le puipuiga atu iinei o le amio le faamaoni, vave fai i ai iuga, Zero Tolerance Policy. O le alu atu la o le ituaiga faiva faavae lea, o le Malo e talitonuina, ma o lea foi e tulai mai pea faaletonu ma apaapa atu le Malo ma sausau loa ma le pelu. Lea foi la e lavea ai le isi vaega o le faiga faavae, lea sa fai foi ma faasalalau atu i le maua o se tagata ua faaletonu, ona faasala lea o le nuu e le toe avea ni a latou tagata mo se piriota. O le agaga o le Malo, ia tuutuu mai tauau o alii ma faipule o le nuu, aua e tele le fesoasoani la e maua e nuu, nisi o Ekalesia.

O le ala foi la lena ou te manatua nei le savali mai a le Afioga foi i le alii faipule ia Ili ma latou foi matai o le latou itumalo ona ua i ai... i le amataga pei lava o le 2016 i le 2017 ona ua tu ai le ta i isi foi amio a tama fanau e o fai i o, lea la ua i ai foi ma tauau o alii ma faipule, ua fesoasoani tele lava i le faa-amiotonuina i le faamaoni, le uunaia o le agaga faamaoni i tama fanau. O le mea tonu lava lena lea e i i le mea lea e taua ai tele pulega mamalu a

alii ma faipule. O lea foi e puipuia e alii ma faipule le faaaogaina o mea o fesootaiga nei televavave ma faaleaga mai ai matai o le nuu i se latou faaiuga ua fai, ae sau upu mai luga, fanau a e ua faasala mai fafo. E le oo la i ai le malosi o le nuu, ae oo i le matai lea e ana le fanau lea.

Lau Afioga i le Fofoga Fetalai, a na leai le pulega mamalu lena a alii ma faipule, se talofa! O le matua vevesi o le Malo o Samoa i totonu o nuu i le tele o le uta fetalai, po o le tofa fetuutuunai a Taitai o nuu, e oo ai lava i le tagata amioleaga le moemoenoa ma le laufaleaina o la e i o i Amerika o la e i o i Ausetalia le soona sau o ni upu leaga e faatatau i le nuu. Ia, o le a la le mea e fai? Ia liliu ane loa lava i le aiga lea e iinei, ma o le tasi lena anava o lo o mafai ai e alii ma faipule ona taofiofi le amioleaga. E le gata la i alii ma faipule, a o latou foi la ia e o i o i mea nei o galuega, e taua tele le sao lea o alii ma faipule i le faasaosaina ma le uunaia o le agaga faamaoni, ia i latou e o e galulue i fafo.

E le gata la i lena, a o lea foi e i ai isi mea malolosi o lea e faaaoga e le Malo, o le faafaigaluegaina lea o se sui sooupu i Niu Sila e fealuai, fealuai ma asiasi solo i vaega nei, e alu ai tupe a le Malo, a o mea e tatau ona fai. O i la i le avanoa lea e fealuai ai ma alu atu talatalanoa, po o a ni latou faafitauli o lo o tulai mai, activate loa e le sui sooupu i o ae ua faapena foi ona logo mai ma le Minisita, ia, ona agai atu foi lea ma le Minisita. Ma e faapena foi e oo mai ia te au i malaga ou te alu ai i fafo i Ausetalia foi ma Niu Sila, o mea ia e oooo i ai talanoaga. E i ai ni faafitauli? Ia ona tau mai uma lea e latou le faafitauli, ma o le ava le mea pito sili ona afaina ai galuega nei.

E le gata la i lena, a o asiasiga faifaiepa a le Minisita ma le Matagaluega e taamilo, taamilo ma talatalanoa. E le gata i lena, e i ai taimi e o atu ai foi fai faaape, ona valaau ai lea o i latou e ana faatoaga e o ane e talatalanoa ma aumai ai, maua mai ai loa i ina faafitauli la e faafeagai ma latou i le va foi ma le Malo o Niu Sila, ona lava tapena ai lea o le Malo, e le gata o le Minisita, ae o au nei i le matou foi faatalanoaga i le alu atu i luga i le maualuga lea e i luga, ona fofa ai lea o le anoano o faafitauli i lalo.

O mea uma la ia, ou te manatu e mafai ona faapea, e tele mau gaoioiga ia e fai e le gata i luga i upufai o Malo, a o le aufaigaluega a le Malo. E le o i ai la ni mea faapea i isi Malo. O le ala la lena, afai e gauai mai tatou, e mafua ona e tele le mau gaoioiga ia e fai i levels eseese ina ia talitonuina atili ai e le Malo o Niu Sila le tulaga maopoopo mai le faiga o tonu e alu atu iinei i Samoa, ina ia puipuia ai faiga faavae, puipuia ai le aufaigaluega mai le tulaga o le o atu i o le faia a latou galuega, ae fai isi mea e tutupu ai faalavelave e tulai mai.

Lau Afioga i le Fofoga Fetalai, o manatu uma ia sa aumai, e mafai ona ou fai atu, pei o ni manatu foi ia ua tutupu ae i le manaia o le saunoaga a le sui usufono. Ia, e i ai lava le matai foi lele, taatia mai, o outou finagalo uma ia na aumai, taatia mai, ae faaauau pea le saunoaga a le Minisita i tulaga uma, aemaise lava le mea lea o le toe tilotilo i tulaga ia o le avatu o latou foi lea e

fou. E afua le faiga lea e i ai nei, ona o le manatu foi lele o latou e le tele se tulaga o le tau aoaoina. E pei o le tulaga lena e le tele se taimi. A o le mea lava ia, e tatau ona feoloolo ni tagata fou e alu pea alu pea nai lo le tutumau pea o se vaega tele na o muamua. E mafua la le mea lea, ona o talosaga a le auaifaatoaga na aumai, se i tau faafeoloolo mai pea tagata na omai muamua e le tigaina latou e toe aoao, ma le tele ai ni apu e tatia.

O le mea la lea, taatia mai. E oo foi la i le vaega lea o le filifiliga ina ia laugatasia uma itumalo ua uma ona ma feiloai ai ma le Minisita, ua fai si umiumi atu ma le auaigaluega, e toe tilotilo i le itu lea, e aofia ai ma le toe tilotilo i se komiti faapitoa a le Malo e faufautua e tilotilo sao lava i mea nei ina ia feed mai pea i le Malo ma le Matagaluega faamatalaga e siitia atili ai le tatou galuega ma faaleleia atili ai. O lea la, o outou manatu uma lava lea na aumai, taatia mai, ae o le a faaalualu pea le galuega. A le faaalualu le galuega ae fai ma toe foi i tua, o lona uiga e uma ia Me le tatou Fono.

FOFOGA FETALAI: Malo. Ia, o le mea sili o lea ua saunoa mai le Malo e taatia mai. A o le Itu Agai, ia, o le a taatia atu.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Lau Afioga i le Fofoga Fetalai, mo se avanoa faamolemole.

FOFOGA FETALAI: Ia, ona o lea ua tatou taunuu i le tatou malologa... Ia malie ia lau Afioga i le Minisita mo Galuega Tetele a le Malo, se i tatou talii mai i le tatou malologa ona e saunoa lea po o le a se mea o e finagalo i ai.

Ia, ou te faasilasila atu ua faataatiaese Galuega a le Fono mo lana malologa masani.

Na faataatiaese Taulumaga a le Fono Aoaio Faitulafono mo lana malologa masani i le itula e 10:49 i le taeao ma toe faaauau i le itula e 11:38 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaio Faitulafono. Ia, ua manatu ua maua foi le faasiliga malosia e le paia o le Palemene i lau Afioga i le Taitai o le Malo ma le Kapeneta e faaauau ai le tatou Fonotaga.

Ia, e faia le malologa o faapena ona tulai mai le Minisita mo Galuega Tetele a le Malo. Se i tulai mai lau Afioga Papalii pe i ai se mea o fia saunoa i ai.

Susuga Hon Papaliitele Niko Lee Hang: Faafetai atu i lau Afioga i le Fofoga Fetalai mo lou avanoa. Lau Afioga sa tau saili lava se avanoa a o saunoa le Afioga i le Taitaifono o le Komiti o Tupe i lana saunoaga sa toe faamalamalama ma faamaioio ai le tulaga o le penisione mo tagata matutua. E manino lava i le folasaga a le Afioga i le Taitaifono, o le vaegatupe lea e faatupe ai le tupe lea mai totonu o le Paketi, Main Budget a lo tatou Malo, ma o tausaga uma lava e feoloolo lava si vaegatupe pe faitau miliona le... Ae o faasalalau lea tou te faalogo i ai faapea a omai ua sii le penisione. Masalo o la e sese i le penisione a le Palemene. O le penisione lena e faatupe lava e le NPF. Ma e fuafua foi la e le NPF ona o lea e fai lava le tatou saoga, le tatou investment i le pension a le NPF, lea e lavea uma ai sui usufono. Masalo la o sese le Vaega Faaupufai lea e faasalalau. E le faia e le NPF ona o lea e fai mai e tele tupe a le NPF. Na pau le penisione lea e fai e le NPF, o penisione a faipule o le Maota o Samoa.

Ae fuafua foi la leaga o lea o le a ave le faamuamua a le NPF i le aufaisaofaga, lea e le misi lava se tausaga o tufa tupe faasili ma faamanuiaga a le aufaisaofaga. Ae ina ia malamalama atili le tulaga lea. Masalo e le o malamalama le vaega lea ma le faasalalau, e le o ni tupe a le NPF lea... E sao e tele tupe a le NPF, a o la e faasoa i le latou aufaisaofaga. A o le tupe lea e talanoa i ai o le tatou penisione o le tupe lena e faatupe e le NPF. Masalo lau Afioga o le lē malamalama lava, e aumai lava le Tala o le Tupe i tausaga uma o la e pupula mai lava le sao o le Malo, pensions lea a tagata matutua. A o lea e fai le talaiga, e tele tupe a le NPF e faatupe ai le faasiliga lea e mananao i ai e faaopoopo i le penisione a le aumatutua.

Na o si mea lea e tasi e fia faapupula ma fia faamalamalama lau Afioga, o la e faafofoga mai le aumatutua i folasaga ia e fai. Ma lou faaaloalo lava.

FOFOGA FETALAI: Faafetai.

Tofa Olo Fiti Afoa Vaai: Lau Afioga i le Fofoga Fetalai, se faamolemole, e pei o lea ua tuu le tatou mataupu sa fai ae o lea ua... ae malie ia lau Afioga i le Minisita mo Atinae ma Galuega Tetele a le Malo, se i uma mai le faiga palota ona ou tago lea e toe faamalamalama atu ia oe le mea lea. Ma le faaaloalo.

FOFOGA FETALAI: Ia, se i tulai mai le sui usufono mo le Vaimauga Sasae.

Afioga Sulamanaia Fetiaia Tauiiili Tuivasa (Vaimauga Sasae): Lau Afioga i le Fofoga Fetalai, masalo o lea ua maea palega auau le taliga o le

sua i le Maota nei, aemaise foi o Ofisa Sili o Pulega o Matagaluega a le Malo ma Faalapotopotoga. Ia ae ona o lea ua oo se faamatalaga foi a le Taitai o le atunuu i faiga faavae. Ou te le fia faalavelave foi la i le saunoaga a le Minisita. Ae ou te masalo o le mea taua lava i lou sui usufono, sa ou oo atu i galuega ia faavaitaimi i tausaga ua tuanai ma ou asia uma ai le tatou atunuu foi i Hastings ma Napier, le mamalu o le atunuu o lo o afifio ai. O le talaave la sa tuuina mai ia te au e ala atu i se talosaga ma se... i mea o lafoga foi nei a tagata o le tatou atunuu lea e o ma tipi ai le tax i galuega ia faavaitaimi. Ia sa o ifo ma talanoa mai ia te au ona e 2 tausaga i le 3 sa ou galue ai i le Matagaluega o Lafoga i Niu Sila. O le system la e alu ai Niu Sila a uma le tausaga ona fai lea o lau tax return, ia ona toe aumai lea pe fia sau mea e toe faafoi mai pe fia foi se mea e toe totogi atu. A o le talosaga lea e avatu ai, e le o entitle ai o tatou tagata. E uma lava omai latou ae o la e i ai... Ia manatua foi o Niu Sila la e i ai e le pei o tatou o le tax lea a tatou e final, o le mea lava ua tipi e le toe maua. A o Niu Sila la, e uma ona tipi ona o lea, se i tulou, ona oo le ai le isi tausaga ona toe faila lea pe fia le aofaiga o tala o le tupe ma...

O le uiga la o lau talosaga o lea na saunoa le Afioga i le Taitai o le atunuu i faiga faavae, ina ia mafai ona omai o tatou tagata ia ona oo lea i le tausaga ona toe entitle lea o latou e faila le latou tax return, aua foi o le tupe lea o lea e i totonu e tatau lava ona toe aumai i tua.

Lona lua, o le talosaga lea sa tuuina mai, leaga o le toatele o sui ia e sausaunoa, e le i oo i ai ma vaai i mea lea na nofo ai le tatou atunuu, ae sa ou oo i ai. O le agaga fiafia i lou sui usufono, o isi o kamupani ia e i ai galuega faavaitaimi ia. E matuai fai lava hotels, ua nonofo o tatou tagata i totonu o hotels. A o le agaga o le sui lea

FOFOGA FETALAI: Ona o lea o le a e saunoa faalauaitele

Afioga Sulamanaia Fetaiai Tauiliili Tuivasa: E leai, o le isi vaega, o le NPF, o la e tipi le NPF a alo ma fanau ia, ae e le oo mai i totonu. O le uiga la o lau tala, fai mai i latou, o la foi e tipi NPF i o, ae ia mafai ona iloa e i inei, aua a faapea e 6 masina, seiloga e uma le 6 masina faatoa sau. E pei o na i tuualalo lea, e aoga i faiga faavae e oo i ai le tulaga lea i taitai. Sa ou talanoa i le toaina lea o Mapusua, a o le tulaga lena. O faiga faavae ia ta te mananao ai, e toe maua mai tupe a le atunuu, sa faapena ona tipi i Niu Sila.

FOFOGA FETALAI: O lea lava e lavea uma i le taatia mai, o lea o le a silasila i ai le Malo. Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga, o le ala lena na ou fautua atu ai, taatia mai. Aua a tatou o loa e auiliili, ona atili maua ai lea o le pepelo a le isi i totonu i i. E ala ona ou taua atu le itu lea, ona o lea

sa faafogafoga lelei lava, i le aofaiga o tagata e mafai ona tatou avatu, e 3,400. A o lea e siisii lava i luga, aua e toatele, ae le...o Niu Sila e pei lava e 11,000 lea e napa ai tagata e mafai na avatu i le Pasefika. A o le a le mea lea e faasalalau e le FAST, e omai loa lava 20,000. O fea e aumai ai lena 20,000. Mo mea o pepelo le mafaufau, o lea la ua tu mai foi Olo ma talanoa mai i le NPF, i se taimi ona tulai mai lea e faamalamalama. E faapefea ona faamalamalama le mataupu e le o tilotilo i ai, ma le 11 miliona lea na tilotilo i ai, ae le malamalama i ai. E matua le iloa e Olo se paupau, i tulaga tau tupe. A o le mea lea e o atu ai i fafo, o atu pepelo, pepelo, pepelo le mafaufau le tatou atunuu. A fai ua e tauto i luga o le Tusi Paia i luma i i, ma e pepelo le mafaufau ai. O a la nisi pepelo e te le faia? A o le mea taua, o le tagata pepelo le mafaufau i luga o le Tusi Paia i totonu o le Maota, toe o atu i fafo, ua faasefuluina le tele. Olo, tuu le mea lea o le pepelo le mafaufau.

FOFOGA FETALAI: E na ona faamanatu atu i lau Afioga, i le Palemia, aua e lua ituaiga pepelo. O le pepelo ma le va ma le Atua, ma le pepelo i le uso a tagata. Se i tulai mai Olo pe sao au.

Tofa Olo Fiti Afoa Vaai: E leai o lena foi e te sese lau Afioga. E ese lava le pepelo le mafaufau, ese le mea o le pepelo le emoemo mata, le pepelo tonu lava lena o lea e pepelo ai le Palemia.

FOFOGA FETALAI: Tulai maia lau Afioga i le Minisita.

Susuga Hon Papaliitele Niko Lee Hang: Ia faafetai i lau Afioga mo le avanoa. Ona o lea sa taua e Olo au i lana saunoaga, e faapea mai. Ou te le malamalama. Lau Afioga Olo, sa ou Minisita o Tupe i le 5 tausaga, malamalama lelei i Tala o le Tupe, tupe faataatitia mai. E oo la i le mea lea o le tatou penisione. E faapefea ona e sau e faamalamalama mai e te le accountant. Ia talanoa lava le tagata i lana matafaioi. A faapea e te inisinia IT, ia fesoasoani ia Afamasaga.

Tofa Olo Fiti Afoa Vaai: Lau Afioga i le Fofoga Fetalai, o mea lava nei tau tupe, a lelei a lau faaopoopo ma lau vaevae ma lau toese, ua lava lava lena.

Susuga Hon Papaliitele Niko Lee Hang: E le taitai lava. O le toese ma le faaopoopo, ae faapefea mea o atinae mea lautetele? A le malamalama ai, e oo i le paketi e le malamalama, e faapefea la ona faamalamalama le mea lea, e te le o malamalama ai?

FOFOGA FETALAI: Ia malo, faafetai. Tulai mai lau Afioga i le Minisita o saunoa, e masalo e le o toe tele nisi o mea o saunoa i ai. aua o lea ua tele ina tali e le Palemia ma nisi o Minisita.

Afioga Hon LAUTAFI FIO SELAFI PURCELL: Ia faafetai i lau Afioga, o lea foi ua toe talii mai ua uma ona tali le sua, ua maua foi se faasiliga malosi. Ae ua omai lava le aualii soona pisa, o lea e fia maua se avanoa o Satupaitea. O le tali lava lona na avatu e le Palemia, taatia mai, o lea o le a ou avatua lona uso, o taatia mai foi. Ua lua la ia taatia ai la faapena ia na mea. O lona tou te malamalama o mea lelei. O le mea ou te faa-amuia ai i lenei scheme o le tele o manatu, a o manatu lelei, e atili ai ona tapue le atinae lea. E tasi lava la le mataupu lea ou te fia oo atu i ai i le saunoaga a le sui usufono. E faafetai foi i le aualii lea na o, le sui usufono o Vaimauga, lea na alu tilotilo i le mea e momoe ai ma galuega a na i alo ma fanau. E le faigofie, e le faigofie galuega o lo o usu i ai a tatou alo ma fanau i taeao uma. O lea ou te alu, ou ae i luga o apu, se i tau tilotilo, se i ou lagona le tiga ma le faigata. E faalua lava ona ou alu i luga o le apefai, ae faa-lima ea Pulotu, lau CEO, uma loa ma lou malosi o lona aso. Ia manatua o nai alo nei ma fanau, e le iloa po o le faa-selau, o tupe la e maua, it's well earned e tamaiti nei. A aumai foi la i inei i aiga, faaoga tatau, faaoga tatau, aua le soona faaaluina, faapea ua tele tupe.

E i ai le mataupu lea na laga e le sui usufono, e aafia ai le tama lea na malaga i fafo, alu atu maua i le mai. E le i iloa i inei, aisea? E leaga o suesuega faafomai sa alu ai tatou, e pau lava ia o mea na require mai e Niu Sila ma Ausetalia. E na o le faata, pe maua i faamai foi ia o le TB ma tulaga faapena. E na o le faata lava ma mea faigofie ona ...e le maua ai la le mai lea na maua ai le tama lea, i le tatou suesuega lona. Ina ua tulai mai la le faafitauli lea, o lea la ua sui le faiga faavae a le Malo. O lea ua manaomia le fai o le full medical check. E le mafai lava ona toe talia se isi e alu ese atu ma tatou, ae le i kilia ua lelei atoatoa lona siaki. Ua i ai foi isi i na i vaiaso ua tea, ua le o, ona ua maua, e i ai nisi gasegase e tuga atu. E pei la o le gasegase lea na tulai mai i le tama lea.

Na taunuu atu lava i o, mai loa. E le i alu i se togalaau e faigaluega ai, e le i alu. Na mai lava i i, ina ua taunuu atu le vaalele. O le sailiiliga mulimuli ane na mautinoa ai, na ona ia silafia lelei o la e mai i le mai tuga lea. Na cover foi i le insure a Ausetalia, a o le faalavelave, e i ai levels e oo i ai le coverage. O ituaiga mai tuga lea, o lea na silasila i ai i le taugata tele o togafitiga ma suesuega sa fai, e taugata tele. E pei na cover la e le insure lea sa fai ona o lea e tulai mai i se tulaga tuga. A o tamaiti uma lava lea e o, e taunuu loa i o fai le insurance cover uma e le employer, te i ua i ai se tulaga e tulai mai i le taimi o la ua taunuu atu, i le mea e faigaluega ai, ma le taimi o la e galue. E eseese la ma le tagata e taunuu loa i o, mai loa, e ese le level o le insurance lona.

Ae faamalamalama le itu lea, e leai e le i faia i faiga faavae e fai ni full medical check. Ae ua fia nei tausaga, o lea ua 14 tausaga o le scheme. A o lea faatoa tulai mai se tulaga faapea ogaoga, o lea foi la ua sui. O lea la e manaomia ia maua le full medical check faatoa alu ese ma Samoa. Ma e le talia foi e Niu Sila ma Ausetalia, ia tagata e le avatua medical checks ia, which e le i manaomia muamua. O le faiga lava ia o mea faapea, we are dealing with people, and people change people are affected in different ways, ma sui agai i ai a tatou faiga faavae e address i ai lena problem.

Lau Afioga i le Fofoga Fetalai, ona ou see mai le isi vaega foi e taua a le Matagaluega lenei. E pei ona ou fai atu e lautele toe lavelave ae o le a taumafai lava i se vave e faamalamalama ai. O nisi o galuega, e aofia ai le vaaiga o tau o oloa, tulaga faapena. O lea na faatu ai le tatou komisi foi lea o le Samoa Competition and Consumer Commission, latou te vaaia. O le tulaga lea sa taumafai e faamalosi le faatauvaga, le competition between tagata faioloa. Aua a encourage le faatauvaga, o lona uiga e pau i lalo le tau o oloa. O ai la e maua ai le faamanuiaga? E maua e le tagata faatau. O le tulaga lena o lea na tuu mai ai i totonu ma fai loa le komisi lea. Se i tilotilo ma mataitu po o tausisi tagata i Tulafono, aua o lea na i ai tatou Tulafono sa pasia. O lea na alualu lelei lava, a o tagata foi lea tatou te feagai, e i ai foi auala ma taumafaiga ina ia maua ai lava se mea mama. Na oo mai i le taimi o le Koviti-19, finagalo loa le Malo, e taofi loa le vaega lea, aemaise lava i mea tau meaai ma tulaga faapena, se i uma le Koviti-19. O lea la ua toe tuu mai le Price Control Board e toe faaauau i le taimi nei. Ia aua ne i i ai se tulaga e faia e nisi ni tau o oloa ua taugata, ae aafia ai lo tatou atunuu i le taimi lenei o le faamai. Ae a maea foi le faamai, ona toe iloilo lea o galuega a le Komisi lea. O le galuega a le Komisi lea ma le Matagaluega o le o foi e tilotilo, e mataitu po o mulimulitaia ia ala o mea e tatau ona, aemaise lava i faleoloa ma fale faapena, ia mulimulitaia le Tulafono. E pei o tulaga foi ia e i ai tusi lisiti, e aumai le lisiti a le tagata faatau, pe faamalosi le tulaga lena.

O lea foi ua i ai le Matagaluega o Tupe Maua, o lena foi ua i ai le latou system ua tuu mai i totonu. O le taumafai lava e aua le i ai nisi e alo i lalo o le Tulafono. Ae ia totogi uma e tagata ma aumai uma mea e tatau ona aumai, ia mautinoa ai o lo o transparent le faia o faatauga o le tatou atunuu. E faapena foi le fua o oloa, ia tutusa uma ia le tau o le mamafa o lea oloa ma lea oloa. Ina ia aua ne i i ai nisi e maua ni a latou tupe i le afu, se i tulou o nai tagata faatau. E tasi lena vaega o le Matagaluega lenei e taua tele. E oo i le tai 800 faleoloa e asiasia i le tausaga pe ova atu foi, o i inei ma Savaii. E le faapea la o nofonofo ai foi, e tai 2 vaiaso alu asiasiga, ne i faapea mai nisi, o la e taugata le... E le mafai ona iloa e le Matagaluega pe a fai e le vili mai tagata ma tau mai, o le faleoloa o ai lea e taugata. E le o faapipiina le lisi o oloa, aua e tasi lena mea, ia alu atu le tagata faatau tilotilo atu, o la e pipii mai le lisi. A i ai la le feeseeseaiga o le tau, ona fesili lea, o le a le mea ua taugata ai le tau o le alaisa, ae o lea e tu mai i i e fia? O le mea lena a le

tagata faatau e tatau ona malamalama i ai lo tatou atunuu. Ona ua i ai foi le laina e valaau fua mai ai tagata, po o le a lava le telefoni, 21425, o le numera lena. E so o se tagata e vili mai, e vili fua mai, e i ai le tagata e tali atu, ina ia faamalamalama se mataupu, ma maua ai e i latou nei e fai mea valea, lea e taumafai ina ia maua fua ni a latou mea i nai tagata faatau e le o malamalama. O lo o i ai foi le vaega o le taumafaiga ina ia lelei ia standards o mea taumafa, o le kodex. E taua tele le vaega lena, ona o standards nei lau Afioga i le Fofoga Fetalai, e aafia uma ai le lalolagi, o international standards, safety standards lea foi la e vaai e le Matagaluega lena, i lalo o le polokalame e igoa o le Codex. E i ai foi la ma le komiti a le Codex, o latou nei e vaaia o la e mulimulitaia e tagata ia standards nei. E leaga e aafia ai tatou mea taumafa, aafia ai a tatou oloa e lau i fafo. Aemaise lava tatou export e i ai le ava, koko o le nonu, o mea taumafa e tagata e tatau ona tatou usitaia ia Tulafono ua faataoto, e tatau ona ausia e i tatou, ia tatou oloa nei e fia avatu i fafo. O le naunautaiga e tele ai a tatou oloa e mafai ona tuu atu i fafo, ma e amanaia foi e tagata. O mea ia e aumai i Samoa e matua lelei lava le vaaiga, e leai se mea e toe fai ai nisi faiga ma tele ai foi le taugata o tatou oloa, o lea e avatu i atunuu i fafo. O le tasi lena o matafaioi o lena Matagaluega, o le fesoasoani i Private Sector Pisinisi Tumaoti, i tausaga uma lava.

FOFOGA FETALAI: Ia malie lau Afioga i le Minisita, tulai mai lau Afioga Olo le sui usufono mo Salega Sasae.

Tofa Olo Fiti Afoa Vaai: Ia faafetai mo le avanoa. E na o fesili lava ia e 2 e fia maua i ai se malamalamaaga. E faafesili atu lava i lau Afioga i le Minisita, faapea foi le Matagaluega, po o ua i ai se faiga faavae i le tulaga lea o le toe siitia o oloa, pe a sioki oloa i totonu o le atunuu. E po o le vaiaso lea na tea nei sa sioki ai le moa, ua alu i luga ma tau a wholesale i pusamo. Ou te talitonu lava o lena sa aumai i lalo o le tatou tau mauualalo. Ae pei ua fai ma masani le tilotilo e sioki loa, ua lele i luga le tau, ma afaina ai le atunuu. O lona lua lau Afioga i le Fofoga Fetalai, lau Afioga i le Minisita, po o i ai se tulaga o le silasila o le tatou Matagaluega i oloa ia e aumai i fafo? O lea sa tatou matauina le tulaga o taga araisa, tulou ma taga suka o lo o aumai ai ma otaota se i tulou le Maota o le atunuu. Pe le o silasila i ni suppliers e aumai ai ni qualities lelei, ni oloa e lelei o latou qualities, aua e fai ma aoga foi na mea, pe numera 1, numera 2, numera 4, numera 5, le mea lea e i ai ma palapala vaeatu lava lou gutu ma le afi. E pei o le mea lena o lea e o atu faleoloa ma lau mai, o lea e faatau i totonu o le atunuu. Ma le faaaloalo.

FOFOGA FETALAI: Se i tulai mai le sui usufono mo Falealii.

Afioga Fuimaono Teo Samuelu Teo: E na ona fia malamalama lava i le tatou Tulafono Tumau, i le vaega e faalavelave ai le sui usufono o le mea e fia faamalamalama ma le mea e fia faasao. Ae le i lauga ai le sui usufono i mea ia, ae o lea foi ua fesiligia ma le alu ai o le taimi o le Afioga i le Minisita. Ma lou agaga faaaloalo.

Tofa Olo Fiti Afoa Vaai: Lau Afioga, o lea o le a ou faamalamalama atu i le sui, leaga o le sui usufono e... O au sa ou lauga i le tamaoaiga o le atunuu, e aofia uma ai lava, lea e alu ai tatou Tala o le Tupe. E leaga o le sui usufono e fou, o lea ou te tau faamalamalama atu ia ia le vaega lea ma le faaaloalo.

Afioga Fuimaono Teo Samuelu Teo: Lau Afioga i le Fofoga Fetalai, ona o le upu e fou. Ae a matau foi i le umi ona i ai le sui usufono, e le o malamalama i le Tulafono Tumau. A o lea e tau malamalama matou nei e fou. Ma le agaga faaaloalo.

FOFOGA FETALAI: O le faaiuga a le Fofoga Fetalai, e sao le isi i le isi itu, ae sao foi le isi i le isi itu, ae tau fai sese uma foi. Ia se i tulai mai le Palemia e fesoasoasni mai i le tali.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le tulaga i mea ia e fia faasao. E tatau ona agai tonu lava i le mataupu lea e manaomia. Se o le mea o le togafiti faavalevatea tele le mea lea. O le fai mai sa lauga i le paketi atoa ae le i taua, e le i taua le mataupu lea. E matua faavalevatea tele nei ituaiga manatu e aumai. O lea foi sa fai Fonotaga e faamalamalama ai ia Tulafono Tumau. E leai ma se isi o latou, e oo lava ia Fiamē. E na o le tasi lava le itula na i ai i i, e oo lava ia i latou uma. O latou uma lava ia e toa-fa, e matua le malamalama i Tulafono o le Maota. Ae o lea e lafi i tua o le faaupuga, e leaga o le paketi atoa lea. E te agai sao lava i le mataupu na e lauga ai. O le tulaga lena lau Afioga i le mea lea, se sa ou faia foi le mea lena o le faitogafiti. O togafiti uma lava ia e te sau ai, na ou faia, o le mea la lena ou te iloa ai, ae sa ou le sao i na taimi. O le mea foi a ta faia soo ia togafiti, tau fuafua mai o lea e nonofo atu tagata, o le atalii o togafiti nei au fai togafiti.

FOFOGA FETALAI: Ia malo faafetai. E leaga o le upu lea na ou manao ai e tau mai e le Palemia. O le atalii o lana fai togafiti lau fai togafiti, ioe...

Tofa Olo Fiti Afoa Vaai: Ae o lea ua ou fiafia lau Afioga, o le atalii o lana fai togafiti lau fai togafiti, o lea ua ou fiafia ai, leaga e matua lona fai togafiti ia au.

FOFOGA FETALAI: Ia, se aua e te tautalaititi i le toeaina. Ua outou matau mai foi le Fofoga Fetalai, se ese lo ta faaaloalo ia outou. Ae o lea ua ou fautua atu, aua tou te tautalaiti i le toeaina. Tulai mai le Minisita e saunoa.

Afioga Hon LAUTAFI FIO SELAFI PURCELL: Se aua e te toe faalavelave, o lea e tau tulituli atu le taimi. O le mataupu lea na faaali mai nei, tuu i totonu o le taga lea na fai atu ai le Palemia, taatia mai.

Lau Afioga i le Fofoga Fetalai, o fesoasoani foi nei e ave i Private Sector, o tausaga uma lava, \$250,000 le tupe e alu lava i Pisinisi nei. O lea e latou te ausia ia faiga faavae e maua ai e i latou le fesoasoani lea i tausaga uma tausaga uma. E oo lava i le \$10,000 isi pisinisi, e fuafua lava i le tele o le pisinisi ma le tausisi i faiga faavae, lea e faataatia atu e le Matagaluega. O tatou paaga foi lea o le Foreign Investments, e tasi lea matafaioi a le tatou Matagaluega. E taumafai ina ia faatupulaia se siosiomaga e lelei mo faatosina mai o pisinisi mai fafo, e omai e faafaigaluega a latou tupe iinei. Ma o lo o taumafai lava le tatou Matagaluega, ina ia fai pea faatosina, fai ma faaaliga e silasila mai i ai, i latou. E fia omai i Samoa nei, e faafaigaluega a latou tupe e ala ia latou pisinisi, e po o le a lava le pisinisi. E i ai foi le faagasologa o mea e iloa ai tagata e tataua ona aumai, ma tagata e le tataua ona omai. O le naunautaiga i mataupu ia, aua a omai ia tagata nei, o lona uiga, e le gata i le tupu o le tamaoaiga o le tatou atunuu, ae tele ai galuega mo tatou tagata e le o faigaluega, ma nisi foi e fia faigaluega, o le naunautaiga lene. Ma atiae ai lo tatou atunuu, po o lava ia taumafaiga lea o le a aumai, po o galuega, faleoloa, faletalimalo, o a lava ituaiga e aumai.

Sa ou tilotilo i le faasalalauga i totonu o le telefoni i le isi aso, i le nuu lea o Dubai, lea e faapea tatou o Dubai o le suauu, Dubai o le oil. A o le mea moni i le taimi leni i Dubai, e le o le suauu la e faamoemoe i ai, e le o le suauu, e 1%, po o lalo ifo o le 1%. O le GDP a Dubai e maua mai i le suauu, sa masani, 50% i luga, o le GDP e maua mai i le suauu. O le a le mea lea ua tulai mai, o mea ia o investments. O investments ia ua sui atoa ai le trading landscape a lea atunuu. E ova i le 60% o tagata o lo o i Dubai e le o ni Arapi, o tagata mai isi nuu, o lea e invest i totonu i i. O lea la e tulai mai ai le nuu lea o Dubai, o se nuu silisili ona mautu lona tamaoaiga. Ma e tele le tupe o lo o faagaoioi ai, o le tulaga lene.

E le o faapea e leaga le mea lea o le omai o tagata i totonu. O le mea foi lene o lea e taumafai lo tatou Malo iinei ia maua ai galuega a tagata ma atinae ai lo tatou atunuu. O isi mataupu e faataua e le Matagaluega leni, o le sailiili, galulue ma le Matagaluega leni, le Faalapotopotoga o le International Labour Organisation, e tilotilo i le lumanai o galuega, ma tapenapena agai i ai ia tatou. E le gata i Private Sector a o le Malo foi, i se taimi o i luma o le a i ai ni galuega e tataua ona tatou tapena i ai. E amata atu lava i aoaoga, e tataua ona tilotilo ia sui le focus, o mea na o lea e talanoa ai pe a o i fonotaga nei e masani ona ou alu ai, the future of work i le lalolagi

lenei ma le suiga o le tau lea e i ai. O le a aafia ai le tele o galuega mo i tatou i le lumanai. E tasi lenei galuega mo le tilotilo mamao, e tilotilo foi la le Matagaluega, po o a ni tapenapenaga, e amata atu i le tatou National University, o le tatou Apprentice Scheme, nisi mea e aoao ai o tatou tagata, ina ia tapena mo galuega e ono tulai mai. O le APTC, o le faamalosi foi i le o i le TVET po o le Technical Vocational Training, e tapena ai i latou. O le auga ina ia siitia le maua galuega, the employ ability of the labour force must be raised. Ia faigofie ona maua galuega, tulaga i galuega o le a tulai mai. E le taumate le isi 50 tausaga, o le a sui atoa le landscape, o tatou galuega. O le a tulai mai isi ituaiga galuega e faaoga i ai tomiai faaonaponei ma faatekonolosi o le a tulai mai. Ae tapena lava tatou i le agai i luma.

Lau Afioga i le Fofoga Fetalai, o na i ootoga na o le Matagaluega lenei o Labour. E le i uma lelei isi vaega, a o le aotelega lenei. Sa saausi lava le saunoaga a le Palemia, i nisi o mea nei o feutagaiga, mo fefaatauaiga, lea sa saunoa i ai le Palemia. E tasi lenei vaega o lo o galulue faatasi ma le Matagaluega lenei, ina ia tulai mai ia se tulaga e pei o le PACER PLUS, ma isi foi feagaiga sa osia, Europa, Peretania, e atili ai le lelei o le faiga o fefaatauaiga, ae i ai ma Samoa i totonu. O le molimau lava ou te mafai ona ou tuu atu, e i ai le saunoaga a le Palemia, lea sa faapea, le taua o mea nei o statutory payments, lea e muamua lava i le tatou budget ona aveese. E muamua lava aveese ma fai foi ma le Tulafono e le mafai ona lotea, te i ua aveese, e isi policy i totonu o le tatou Malo. O le taua o le mea lenei, talu ona ou alu i fonofono nei i fafo, e tilotilo lava po o ai nuu ia ua maea ona totogi a latou sao i totonu o Faalapotopotoga tetele nei. E leai lava se taimi ua ou alu atu i se fonofono ae faapea, e le i totogia le sao o Samoa i totonu o Faalapotopotoga tetele nei o le lalolagi lea e auai Samoa. E mitamita lo ta ita agaga le Taitai sui usufono, e leai, o isi nuu o la e i ai, a o nuu e tele atu a latou tupe. E tele atu o latou tamaoiga. Ae muamua lava ua uma ona totogi tupe a Samoa. O le mea lea ou te fai atu ai lava, o le faataua lenei o Samoa ma lona leo i totonu o feutagaiga o agreements e fai, ma fonotaga ma isi sui usufono. O le dignity o le tatou atunuu, e ride i luga o le mafai e tatou ona tatou ausia ma tatou faia pea, ia mea ia ua tatou ioe tatou te faia. E pei la o le totogiina o tatou sao ia, ma isi lava mea uma lau Afioga. Ua maea atu ai se, i lenei Matagaluega, ae pei ona ou fai tau e 9 au Matagaluega. O le a tope atu le isi vaega lea, atonu lava e...

O le Matagaluega lea o le Public Enterprise. O le Matagaluega lea na faatu Aso 25 o Aperila 2014. E manatua pea lenei aso, o le aso lea na tofia ai au e le Palemia e avea ma ana Minisita o le Matagaluega lenei.

O le auga sa i ai le Matagaluega lenei ia taumafai ia faamaopoopo uma mai ia tatou Faalapotopotoga Tumaoti nei. E 27 Faalapotopotoga Tumaoti lea e i ai, vaevae i Vaega e 3. O Public Trading Bodies po o Faalapotopotoga ia o lea na faatu ina ia maua mai ai ni tupe, ia galueina tupe a le Malo, ia maua

mai ai ni polofiti e tai pei o kamupani lea e i fafo, fafo atu o le Malo. Ia e 8 ia mo mea mo Public Beneficiaries, ia ma le 3 ia Mutual Societies.

O le taumafaiga, taimi muamua sa i lalo o le Matagaluega o Tupe ia le Matagaluega lenei. O i ina e pei na o si vaega lea e pei o se tamai unit laitiiti, ia ona faatu loa lea o le Matagaluega lenei, ina ia tilotilo i auala o lo o faatino ai galuega, ma le faagaioiga o tupe a le Malo. Aua o tupe a le Malo lea i totonu o Matagaluega nei. O lea la ua savalia nei i le 6 tausaga, ia ua tulai mai o se tasi o Matagaluega o lo o fesoasoani malosi i le taumafaiga a lo tatou Malo.

Ma i le taimi na faatu ai, ioe 2016/2017 \$2 miliona le tupe na aumai, \$2 miliona ma le afa 2017/2018 \$3 miliona ma le afa, 2018/2019 \$15 miliona na aoina, 2019/2020 \$6 ma le afa miliona, 2020/2021 \$9 miliona na aoina mai e Faalapotopotoga nei a le Malo. O le aotelega e \$36 miliona ma le afa tupe ia lea ua mautu mai i totonu, ia ona o le overall supervision a le Matagaluega lenei, lea e taua o le Matagaluega e latou te vaaia Matagaluega Tumaoti a le Malo. Ia o le taumafaiga lenei ina ia tutusa uma le o a Matagaluega Tumaoti nei. E tasi lava le auga ina ia galulue ia vaaia lelei aseta a le Malo ma maua mai ni tupe e fesoasoani i le Tala o le Tupe a lo tatou Malo.

O le isi taumafaiga ua sili atu ona suia talu ona tulai mai le Matagaluega lenei, a tou silasila i tatou lipoti ia e aumai nei, aumai nei Lipoti Faale-tausaga. O Lipoti uma lava a Matagaluega Tumaoti nei, ua leai ma se toe tuai, lea ua atoatoa i i latou lipoti nei. Atonu o lo o silafia e le Komiti o Tupe, leai ma se Matagaluega ma Faalapotopotoga Tumaoti a le Malo, o toe tuai mai ia ni a latou lipoti. Ua uma uma lava ia le 2019/2020 ua oo mai uma i i. O le tasi lenei galuega tele a le Matagaluega lenei, ia mautinoa, ia aumai lipoti i le taimi e tatau ona aumai. The reporting foi lea e aumai i Matagaluega uma, ia taunuu lava i le taimi e tatau ona fai ai. O lea la ua faafaigofie ai galuega a le tatou Palemene, ia aua o lea e talanoa i le lipoti ananafi. Ae o le mea sa i ai, e talanoa i le lipoti o le 3 tausaga talu ai. E leai se uiga e pei ona saunoa ai foi le Palemia.

Ia ona ou oo mai lea i le tatou vaalele lau Afioga, ia atonu o lo o fesiligia pea. Ia o le manao lava latou na o ta manao e aumai ananafi le vaalele. Ia ae o lo o fuafua lelei i le taimi lenei i le faaletonu o le tulaga ua i ai le maketi ma le feoi o tagata, e sili lava lo tatou onosai se i sefe lelei ma o tatou mautinoa, ia ona aumai lea. Ae o le vaalele ia o le taumafaiga a le Malo, o lo o tuu atoa i ai le malosi. E pau lava lea o le taumafaiga o le taimi sao e aumai ai. Ia aumai i le taimi e tatau ai ona faaoga lea. Ae o lenei e silafia o le lalolagi atoa lea e aafia. E le o ni... pe tasi se tamai nuu lea e aafia i mea nei, o le lalolagi atoa. O i ina lea e fuafua i ai, e aumai ai ia o tatou tagata e tafafao mai. Ia ae o le naunautiga o le Malo, ia vave ona aumai. Ou te lagona, e le toe umi lava, ou te le o manao e tau atu se taimi, te i foi ua oo

O le agaga tonu lena o le Malo, lea ua 30 tausaga o le Matagaluega lenei. Ia mai i le \$10 miliona na ave i ai e le Malo 1990, e oo mai i le 2010 uma lelei na totogi e le Matagaluega ia le \$10 miliona lea i le 2010. O le taimi lenei, i le atoa o le 30 tausaga, ua \$65 miliona le tupe lea ua faataamilo i totonu o le Matagaluega lenei. Ia, tupe lea e saofaga ai i latou e manaomia le fesoasoani. O le aofai o tagata o lo o i ai i le taimi lenei o lo o nono mai ia latou tupe i le vaega lea, 4,000 tagata ia e i totonu o le faamanuiaga lenei o le tatou Matagaluega lenei ia o le Housing.

Ia o lo o faaauau pea ia galuega lelei ma e o lo o tele ia tatou tagata ua oo mai i lou Ofisa, momoli mai le faafetai, ina ua faatoa nonofo lea o latou i se falepalagi. Faatoa nonofo lea o i latou i ni fale ua latou mafai ona faia le loan ae totogi, aua e maulalo tului, lea e galulue ai ia le tatou Matagaluega lenei. Ia ua i ai ma fale foi ia a le Malo sa i ai i lalo o le Matagaluega e 72 fale na, lea ua aumai uma lava i lalo o le Matagaluega lea e latou te vaaia. O lea la ua toe faafou uma, atonu sa faaletonu i lena vaitau ia le vaaiga ma le maintain ina o fale nei o le Malo e 72, lea la ua tuu mai i lalo i i, uma lelei ona toe faafou, faafou i se tau taugata. Ae o lea ua sii i luga ia le value o fanua nei, ia ma la ua nofoia e tagata i le tau lava o la e i le maketi. Ia ua maua mai foi tupe a le tatou Malo.

Ia lau Afioga o le taimi o le faamai, ia o lena na ave foi le fesoasoani a le Matagaluega i ai latou o i ai ia latou nonogatupe, ia sa faapafala, faapafala le totogiina mai o latou nonogatupe, ia mo masina e 2 masina. Ioe, 2 ma ona tupu masina, lea sa tuu i ai le avanoa e aua ai le totogiina, ae faamuamua ia le tatou vaai i le faamai. Ia ua i ai foi le fuafuaga, ua fai foi le lisi mo Savaii, se taimi ona faatino loa le latou auaunaga i le motu i Salafai i le latou lava Ofisa fou pe a faatu, ae o lo o i ai le Ofisa i le taimi nei i luga o le maketi. E agai foi i ai tagata, le mamalu o le atunuu o lo o i Salafai. O le tasi lena galuega o le tasi o Matagaluega lau Afioga o lo o ou vaaia e oo mai i le taimi nei.

Ia ona ou oo mai lea i le Samoa Land Corporation, ia po o le vaega lea o lo o vaaia ia fanua o le Malo lea sa ave i ai, ma le malamalama o le tatou atunuu, e le na o le pau lea o fanua o le Malo e i lalo o le Samoa Land Corporation. O lo o i ai le isi vaega tele atu, i lalo o le tatou Land Board. E 24,000 le aofai o eka na tuu mai i lalo o le SLC. O lea la ua uma ona fai auala ma tulaga faapena, tulai mai ai le 20,000 ia fanua nei. Ia ua tele lava ia fanua iinei i Upolu ua uma ona fua ma faasolosolo atu ai ia le fuaina. O le tele o isi fanua ia o la e i Salafai, ma e le i oo i ai le fuataga. E pei o i ina i Ologogo, ia o Lata, ia pei o Falelima lea e i ai fanua tetele o le Malo, e le i fuaina. A o lo o i ai le fuafuaga i se taimi o i luma, ia ona oo atu ai lea o le fuataga, ia ona malamalama ai foi lea o le tatou atunuu, i tulaga o fanua.

Ia sa talanoa foi i le Afioga i le Palemia, i luma atu na maua mai ai nei fanua, atonu ua malamalama foi ia na mataupu, ia ma nofoaga ia e tau o nuu tu taulaga, ia ma fuafuaga foi a le Malo na ala ai ona fai ia na foi fuafuaga,

ia i ai fanua o i latou nuu nei, ma faapitoa na fai i ai. Ia o tupe a lenei Matagaluega lau Afioga e maua mai lava i lisi o fanua. O lo o lisi ai tagata, lisi ai kamupani, ia faapea nisi o le tatou Malo, o Matagaluega a le Malo o lo o lisi ai i fanua nei.

Ia o lea ua i ai le fuafuaga a le Matagaluega o le a fausia se maketi i i, ioe le maketi lea i Sogi. O lea e fuafua i ana galuega tele o le atinae o lea vaega o le tatou atunuu ia aua le agai i luma o isi foi fuafuaga a le Malo. O fuafuaga uma lava nei a le Malo, o lo o tilotilo i ai i le taimi lenei. Ia atonu o le faaiuga o le tausaga nei lea ua amata ona tanu, ia atonu e amata ona fau ia lena foi atinae tele a lo tatou Malo, ia ona atili ai lea ona tulai mai le itu lea, ia i se tulaga matagofie, pe a uma ona fai uma ma auala.

Ia ona ou oo mai lea i le Matagaluega mulimuli lau Afioga, o le vaega lea e vaaia ia tatou faletaaalo. Ia o le Samoa Sports Facilities, ia faatoa... atonu faatoa aliali lava i luga le Matagaluega lenei pe a ua i ai ni taaloga foi ia e fai i Samoa. Ia o taimi uma lava ua i ai ni taaloga ua fai mai i Samoa, e leai lava se taimi ua taofia ai ia taaloga nei, ona ua faaletonu ia o tatou malae. O lo o galulue lava ia le Matagaluega lenei, ia oo atu i le taimi ua manaomia ai e le Malo ana malaetaaalo, malaeaa, tulaga i le Apia Park, ia o la e lelei ona faafae. Ia e momoli ai le faamalo i lea foi Matagaluega, ia ona o lea itu. Ua tele ia tatou taaloga e fai mai i nei, ia o lo o lelei lava ia le vaaiga o aseta nei a lo tatou Malo, ia aua le faataunuaina foi o faamoemoe o le tatou Malo.

Ia lau Afioga i le Fofoga Fetalai, ia o se faaiuga lena o nai au Matagaluega, ia e moni lava e le i matua saausi lelei ia le... ia atonu ua lava ia lea mo lenei taimi. Ia lau Afioga, ona ou toe foi mai lea i le Maota lenei lau Afioga. E faamalulu atu lava, ona o lea sa taumafai lava, ina ia vave ona uma atu galuega sa tapena i ai i Matagaluega. Ia se i tau sue atu ua tele pepa nunumi atoa ia le... ae lau Afioga i le Fofoga Fetalai, o lau toe foi mai i le... o le fia faia o se vaega o lau lauga lenei... o le agaga o le faafetai ma le faamalo lau Afioga.

O Afioga i le Palemia ou te fia oo muamua atu i ai. Lau Afioga i le Palemia, ia avea lenei taimi e avatu ai se sao o Satupaitea. E momoli atu le faamalo ma le faafetai i lau Afioga, i le taitaiina o le tatou Faigamalo. O lena tausaga sa ou aafia ai i totonu, i lalo o lau taitaiiga. E le maua ni upu e faamatala ai ia le agaga fiafia o lou itumalo, i lau taitaiiga faataitai, taitai. Taitai e toa le loto, taitai e le fefe, e fai faaiuga e tatau ona fai. E le faamalieina ni tagata se toa-10, po o se toa-20, po o le toa-100 foi. E fai faaiuga aua le lelei o le 250,000 tagata Samoa. E le fefoifoiai ia tonu fai, a ua fai le faaiuga e tatau ona fai, fai. E le fefe e fai faaiuga.

Ou te faafetai atu ona o le vaai mamao lau Afioga, mataupu lava ia ou te faalogo soo i le Palemia o talanoa ai. E le mafai ona faapea e alu alu gata, leaga o mataupu o lea e silasila mamao le Afioga i le Palemia mo le lelei o Samoa, climate change, climate change. O le suiga o le tau, atonu e le o mamafa i nisi o le atunuu lenei, atonu e le o mamafa. Ae o lea lava e sasa

atu lava se i tulou e le Palemia i ana saunoaga faa-taitai, leaga o le fili lea, o le lui lea, o lo o feagai nei ma le lalolagi lau Afioga i le Fofoga Fetalai, e le mafai, le mafai, ona alo ai se isi, e le mafai.

A tatou le galulue faatasi le tatou atunuu ma isi atunuu o le lalolagi, e le mafai ona tineia, pe faaitiitia le fili lea ua tulai mai. Ou te faafetai i le Afioga i le Palemia, ona o le uunai pea o lenei mataupu. O se taimi tonu foi o le mataupu lenei na ou alu foi i fonotaga i fafo e maua loa lou avanoa, ou lauga loa i le mea lea. O lau tala e masani ona fai, a o tatou pisa ai i totonu i inei ma o tatou talanoa, o la e goto i lalo isi motu o le Pasefika. O lau tala lena e masani ona fai, e matua tau lava i faiai o tagata ia e tetee mai upu na, a o tatou pisa ma o tatou talanoa, o la e goto i lalo nuu o le Pasefika.

O mea ia e saunoa soo i ai le Palemia, e i ai nuu e le toe i ai. E i ai nuu e le toe i ai, o le isi 100 tausaga ua le toe i ai. O ai la e pau i ai na mea? Fesiligia lea o a mea a taitai sa fai? O lalo o le taitaiiga a le Afioga i le Palemia, lea sa fai lava le mea e tatau ona fai, faamanatu ma fai faiga ia ititi ai tatou aafiaga. E moni o tatou lea e tele ai le kasa oona lea e... ae leaga o lea e tatou te ola uma i le lalolagi lenei. E tatou te aafia ai, e tatou te aafia ai. E fai la le tatou galuega e tatau ona fai i lo tatou nuu. Ia o na ua i ai faiga faavae a lo tatou Malo.

Tulai mai ia tatou Tulafono ia lau Afioga i le Palemia, o i ina na manaomia ai Taitai e tilotilo i le mea e tatau ona fai. O Tulafono ia e 3 lea ua pasia, ma e le umi foi sau tautala i ai. E pau o se vaivaiga ia te au, o lou faanoanoa, ona o tagata sa tatau ona lagolagoina Tulafono nei, latou te le i lagolagoina. People who should have supported these, didn't. They should have known better but decided to go the other way, or look the other way for whatever reason.

O Tulafono nei e 3, faafetai lava i lau Afioga i le Fofoga Fetalai, maua lenei avanoa e faafetai ai i le Komiti lea na o e fai ia... e faatalanoa, faafetai i le toa o outou loto. E le faigofie le tetee mai o nisi o le atunuu, ae i lou lava talitonuga, o i le avanoa, o i le avanoa, e fai ai mea ia na moemiti ai o tatou tuua i le 60 ma ona tupu tausaga talu ai. Na faatu ai le lafo e le sui usufono o Palauli le toeaina o Toluono Lama, na ou maua ifo le toeaina lea i le taimi o ou aoga. E pei o le tasi lena taitai toa o Samoa sa i ai, sau mai i i Palauli, le mea lea e afio mai ai lau Minisita Lagolago. O lea na faia le lafo, tuu i totonu tu ma aga a Samoa i totonu o le Faavae, ae i ai uiga tatau na ala ai ona le faia.

O lea la ua maua le avanoa, o ai la e tuu mai i le toa-4 lau Afioga i le Fofoga Fetalai, e toa-4 matai o si o matou nuu na i ai i totonu i i. Sa i ai i totonu, se i sue ifo lava lau atoponapona lea, Faavae lea, lea e i ai toeaiina ia e toa-4. O lou itumalo sa i ai i le tusiga o le Faavae. Na i ai foi la le taimi na faatu ai le lafo lea. O lea la e tilotilo mai, po o fea o i ai le sui usufono o Satupaitea i le taimi ua tatau ona tulai mai fai mea ia sa moomoo ai. Asiata Lagolago ou te iloa tagata nei, Asiata Lagolago. O se tasi o toa o le matou itumalo i le

amataga maiga, amataga mai ina.... Asiata Tulelei, o le isi foi Asiata matua sa i ai, sui o Satupaitea. Faanana Fenika, o le alo o Lilomaiava, mai Satufia le pitonuu i Satufia. Gasu Taatua, o le tausoga o au le toaina lea, mai i Pitonuu. 2 Asiata, 1 le Aiga Samoeleoi, 1 le Alo o Lilomaiava lea sa i ai i i le faiga o le Faavae. O lea la e tilotilo mai, o le a ea le taimi e tulai mai ai se sui usufono o Satupaitea e faataunuu i le Faigamalo o le a i ai, tuu le Tulafono lea o tu ma aga a Samoa i totonu o le Faavae. O lea ua taunuu, o lea ua taunuu.

E momoli ai le faafetai i le Afioga i le Palemia i le tele o luitau, o lea ua tofafa fiafia toeaaina nei, lea e i ai le sao o Satupaitea i totonu o le Faigamalo ua faataunuuina mea na o le miti i ai o latou, ae sa le mafai ona latou faia, ona o nisi o mafuaaga tatau. O lea ua taunuu le latou vaega. They played their part which is, Tutoatasi Samoa. Ae o le a la le mea a tatou e fai? Tatou tafafao atu lava i luga i faaiuga na fai e na toeaaina? Leai, fai e tatou isi mea, e alu ai i luma Samoa e pei la o le mea lea, e pei o le mea lea.

Ia, ou te faamalo, e pei ona fai atu e le uma le faamalo i le Palemia i le tulai mai o le Koviti, ia e le faigofie lena taimi ia Samoa. E manaomia se Taitai e lototoa ma fai ana faaiuga, i musumusuga lilo a le Atua. Lau Afioga i le Fofoga Fetalai, o mea nei o le faamai, e le fou, e le fou lau Afioga. I le taimi na alu ai Mose e taumafai e aveese le fanauga a Isaraelu, ia ua fiu e taumafai le tama lea o Farao. Ia ae lotu malo lava se i vaeane le... ia na tuu foi i ai e le Atua mala. O le tasi o mala, o le faamai, o le tasi o mala o le faamai le plague lea na tuu i ai, ae lotu malo lava le tamaloa o Farao. Ina ua o ese foi le fanauga a Isaraelu mai Aikupito, sa fesetai i le toafa. Maua foi i le faamai tupu ai faamai i totonu o le latou togalau... campus togalauapiaga, ona alu lea o Mose i luga o le mauga.

O au e seasea ou lauga i le Tusi Paia. E seasea ona ou lauga i le Tusi Paia, ae o le mea lea na ou fai atu ai, na muamua lava taunuu le lotu i Satupaitea. O lea la na lolotu ai tagata ma malamalama i le Tusi Paia. Pe faitau le Tusi Paia pe leai, o lea e malamalama lava i le Tusi Paia. O au foi e lelei lau Kapite i le Lotu Pope i aso la o ou aoga. E faapea ai ou te le lauga i le Tusi Paia ae faapea lea ou te le iloa le Tusi Paia. E lelei se sauea, o lea e moni lava lau Afioga.

Fai mai le tala a le Atua ia Mose, Mose o le a le mea la ua tupu i lalo? Faamolemole lau Afioga lou Atua, ua maua lou nuu i le faamai. O, o le a la outou mea na e fai i ai? O lea ua ou sau po o le a se fofo. O le tala a le Atua na fai i ai, Mose, alu e fai i le tama lena o Arona, fau se apamemea. Ae o lona uiga po o se apafafano lena i lenei vaitau, fau se apafafano tele, faatu i le faitotoa e ulu ai i totonu le fanauga a Isaraelu pe a o e momoe. Fai ia Arona, fafano outou lima outou ma lau fanau, ae tou te le i o i totonu ne i te i ua outou pisia i le faamai ona tou feoti lea. Esoto 13 lena e manino ai le tulaga lena. Toe oo ifo i le tusi a Levitiko lena foi e toe faalatele ai, a maua le faamai, aveese tagata mo le 7 aso. Ua outou faalogo mai i le mea lea e fai

mai ai le Atua? 7 aso. A uma atu le 7 aso o lo o maua pea i le faamai, toe faaopoopo le isi 7 aso. A uma foi toe faaopoopo se isi 7 aso ma aveese tagata nei, tuu i tua atu o le mea o lo o tolauapi ai lou nuu.

Afioga Afoa Amituanai Faleulu Maui: Lau Afioga i le Fofoga Fetalai...

FOFOGA FETALAI: Ua le toe umi se tatou taimi, ua faasa le faauilavea.

Afioga Afoa Amituanai Faleulu Maui: Lau Afioga o se mea e fia faamalamalama i le saunoaga a le Minisita faamolemole.

FOFOGA FETALAI: O le mea tau Tusi Paia, e te le i saunoa i se Tusi Paia.

Afioga Afoa Amituanai Faleulu Maui: E feoloolo foi si ou atalii i le Tusi Paia. Na pau lava se mea e fia faamalamalama i le Minisita, o le faamai lea e talanoa ai i le fanauga a Isaraelu, e le o se faamai faapea na... na mafua mai i le Atua. A o le faamai lea e tupu nei, o le faamai mai ia Lusifelo. O le eseese la lena o le faamai lea e talanoa ai le Afioga i le Minisita.

FOFOGA FETALAI: Ia, malo. Pei lava e foliga ua tasi lau mea e sao. Ia, se i tu mai le Minisita pe moni la le mea lea.

Afioga Hon LAUTAFI FIO SELAFI PURCELL: O le faamai lava o le faamai. E le faapea e eseese ni faamai. Po o le a lava le ituaiga faamai. E le o fai mai le Tusi Paia o le Koviti lea ua outou maua ai. E leai, e ese foi le faamai na tupu i lena taimi, ae o le musumusuga a le Atua lea e sau ai lava i totonu o le Tusi Paia lea e oo mai i le taimi lenei. O musumusuga paia na a le Atua o lea e talitonuina tele e le Afioga i le Palemia ma le Faigamalo lenei. E leai ni o tatou tomai tatou te iloa ai mea e tataua ona fai. I le taimi na tulai mai ai le faamai ma oo mai fai mai e fia afe tagata ua feoti, o le faamai oti ua oo mai. Sa matuai ou popole lava...

Afioga Afoa Amituanai Faleulu Maui: Lau Afioga i le Fofoga Fetalai...

Afioga Hon LAUTAFI FIO SELAFI PURCELL: Se soia ia e te faalavelave. Nofo ia i lalo.

FOFOGA FETALAI: Ia, se malie ia lau Afioga e le o toe tele se taimi o le Minisita.

Afioga Afoa Amituanai Faleulu Maui: O se mea e fia faasao lau Afioga...

FOFOGA FETALAI: Ia, se i tuu toe atu ia le avanoa. Malie lau Afioga i le Minisita.

Afioga Hon LAUTAFI FIO SELAFI PURCELL: Tuu ia se i faauma taeao.

Afioga Afoa Amituanai Faleulu Mauli: Lau Afioga i le Fofoga Fetalai, o lea e fai mai le Minisita o le faamai oti. O lea ou te fai atu e le o se faamai oti le faamai lea tatou te i ai nei.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, a o le i pau Atamu ma Eva, e leai lava ma se faamai na i ai, leai lava ma se faamai. Ae na agasala loa Atamu ma Eva, sau loa ma faamai uma, o le vaega o le tatou sala, sau loa ma le oti. O le tulaga lena ina ia silafia e le sui usufono, e le i i ai ni faamai i le taimi ae le i agasala le uluai tagata, leai se oti, leai se faamai. Ae o le taimi lava na agasala ai le tagata, sosolo mai loa uma lava ma faamai, ma tiga ma mea leaga uma, lea la ua tatou faapeaolaina ai, o le tatou agasala lena e afua uma ai nei mea uma. Ia, o le faapuupuuga lena.

FOFOGA FETALAI: Malo faafetai. Ia tulai maia lau Afioga i le Minisita e faaii mai le saunoaga.

Afioga Hon LAUTAFI FIO SELAFI PURCELL: Faafetai i lau Afioga. Ia, e faamalie atu foi i le sui usufono mo Palauli, leai o taua lava ia o ta tala tausua, ae ua fai atu foi se... e leai e le faapea foi o faatonu atu e Satupaitea le sui usufono mamalu. O ta tala tausua lava i lou tulai mai foi. A o lena ua tulai atu le Palemia. E pei o le mea lea sa ou tautala i ai ona o lea e faalogo soo le atunuu i le saunoaga a le Palemia o tau lava le musumusuga lilo a le Agaga Paia. O lea la ua ou taumafai e aumai le Tusi Paia, faatoa ou lauga ai lava lea i se Tusi Paia talu ona ou faipule, e faamaonia ai, e sao lea ituaiga folasaga lea. O la e lava e i totonu o le Tusi Paia faatonuga a le Atua i le mea e tatau ona fai pe a tulai mai faamai, pe a tulai mai, aveese. Faanofo vaavaaia i le 14 aso. Afai e leai, ia toe faaopoopo le isi faa-21 aso. E puipuia ai le atunuu. O le a le mea lea e tupu i le musumusuga paia a le Atua lea e sau? A lea e leai lava se faamai o maua ai Samoa, na o tagata e omai mai fafo lea e omai e aafia ai, ae o lo o malupuipuia Samoa, o lo o malupuipuia Samoa. We can hold our heads high and say Covid never came to Samoa. Its never in Samoa. Aisea? O le musumusuga a le Atua lea na tatou tapenapena ma tatou sauniuni i ai, lea ua tulai mai.

O lau faafetai i lau Afioga i le Palemia. Ia, i lenei itula, ou te fia momoli atu le faafetai a si ou itumalo, faafetai tele i lou tofiaina o se sui usufono o

Satupaitea e avea ma se tasi o ou auvaa i tausaga ia ua tuanai atu i le 5 tausaga, e faapena foi i le isi 2 po o le 3 tausaga o le Paeaiga i ona tua atu. Ua maualuga lava lau faaaloalo lau Afioga i si ou itumalo. Ia a o le fesili lava; a o ai le tagata ua e manatu ane ai? Faafetai i lau faatamalii, faafetai i lau faaaloalo, ua faanofo Satupaitea i luga o le maasalafa. Na pau lava lau tatalo lau Afioga, sa mafai e le sui usufono o Satupaitea ona faamalieina lou finagalo i se taumafai ma se tautua le auau sa mafai ona ou faatinoina i le Kapeneta, a o se taumafaiga na oo i ai, o le taumafaiga lava na gata ai le mafai, na faia lava mea uma i le malosi ma le tomai na tuuina mai e le Atua ia te au. O le tatalo a Satupaitea, ia faafualoa pea e le Atua lou soifua, lou soifua galue, lou soifua faa-Taitai e te taitaia ai pea Samoa. Ia utupupuina e le Atua ma faasusua moegaluaga aua le faatautaiga o le sa o Samoa ia malaga ai i lagima.

Ona oo mai lea o lau tautalaga lau Afioga i nai ou uso a Minisita. Ia, i lena 5 tausaga sa tatou nutimea faatasi, faamalo lo outou galulue punouai, sa tatou tafai alo le vaa aua se lumanai o Samoa i lalo o le taitaiga a le Palemia. Ia, o le manatu lava, talosia le faiga filifiliga o le a toe tulai mai a outou Afioga e tauave pea a tatou galuega lea na tatou galulue ai.

Afioga i Minisita Lagolago, ia, e faapena foi se manatu. Faafetai i lo outou galulue faatasi ma Minisita, ua faafaigofie ai galuega i lena 5 tausaga.

E faapitoa si au faamatalaga i lau Minisita Lagolago le Afioga ia Tuifaasisina Misa Risati. O le ma masaniga ma Tuifaasisina, na ma masani mai ma Tuifaasisina o ma o i le Primary School. Sau ai lava sau ai lava ma o i le Kolisi o Sanele, a o lea ua oo mai nei le ma savaliga. O lea ua tofia mai maua e le Atua o lea lava e tauave le ma vaavaalua ma si ou uso nei. Faafetai Tuifaasisina, oe ma lou faletua i lou lagoon malosi ia te au i le faia o ou tiute faa-Minisita Lagolago, e te le i foi lava, pe e te alo foi i le ata o le laau. O le tele o isi taimi e le talafeagai ma lau Afioga, ae sa e galue lava aua le lelei o le ta Matagaluega, aemaise foi le ta va faa-Palemene. I le tulai mai foi o ni faaletonu foi i lou itumalo, sa le alo ai lava le faiga o au galuega. Faafetai i lou punouai i le taumafaiga o le tatou atinae o le tatou falemai. O le tele lava o taimi e te le avanoa, ae sa e alu alva e taumafai ma sina fesoasoani mai le ta uso i Palauli le Falefa. Ia, o le tatou atinae lea e tua i ai tatou tagata o tatou itumalo ma tatou itumalo e 3. O lau faafetai lena lau Afioga.

Ia, le mamalu o le Maota Fono nei i usugafono uma o lo o i ai nei, o le tatalo lava, ia faamanuia le filifiliga a le tatou atunuu o le a alo atu i ai, faafetai foi mo la outou lagolagosua i Taitaifono o Komiti, aua lo outou tiute fita o outou o Taitai o Komiti faapea foi sui usufono uma sa taumafai ia togi maa uma i totonu ina ia manuia galuega a le Palemene lenei.

Ia, i Ofisa Sili o Pulega uma o Matagaluega uma a le tatou Malo, faamalo faafetai lo outou galulue. Faafetai le tautua Malo. Matagaluega uma lava o lo o i lalo foi o a outou vaaiga, e faamalo atu i le latou foi pitolaau, e le mafaia e le Malo ona fai na o i latou se mea, vagana o i ai la outou lagolago,

o lo o i ai lo outou agaga fia tautua. Tuu atu foi la i a outou Matagaluega, e faapena foi. Faamalo le galulue. O le taimi na tulai mai ai le faamai lau Afioga i le Fofoga Fetalai, sa mitamita lava le agaga i le tulai mai o Matagaluega eseese e puipui Samoa. O lena tou te silafia e outou, o Matagaluega uma, e leai se Matagaluega e faapea e faafiti i te i ua pisia. E leai. E fai atu lava fuafuaga a le Malo opogi loa. O se mitamitaga lena ia te au, galulue faatasi, mai lava i le CEO tau lava i le avetaavale, galulue uma tagata ina ia tinei nei fili po o lenei luitau o le a oo mai ia i tatou.

O Ofisa Sili o Pulega o la'u Sector e toa-iva, e momoli atu le faafetai ia te outou i le 5 tausaga po o le 8 foi tausaga i nisi. Faatoa amata mai lava ona ou tulai mai o tatou galulue, o au o le Minisita ma outou o lo o faauluulu i ai Matagaluega na tofia ma e le Palemia ou te galue ai. E avatu lau faafetai ia te outou i lo outou talia o se fautuaga, se tuualalo, ia po o se faatonuga foi i le taimi o lou tulaga o au o le Minisita e taitaia le tatou Matagaluega. E leai lava, talu mai le taimi na ou Minisita ai, e leai se taimi faapea na faaletonu ai le va o outou ma au. Sa outou galulue ma faalogo i ni tuualalo ou te avatua. Ia faamanuia le Atua ia te outou uma. Tau ina ia alofa le Atua ia faaauau pea la outou auaunaga i na tofiga ua tofi ai outou e le Atua. E le faigofie, ae faamalo.

Lau Afioga i le Fofoga Fetalai, e molimoli atu foi lau faamalo i tatou sui o tatou Malo o lo o i atunuu i fafo. I le tele o malaga ou te malaga atu ai i fafo, e le mafai ona faaletonu tatou sui nei o lo o nonofo e tauave le igoa o Samoa i atunuu mamao, i Peleseuma, Amerika, Saina, Ausetalia, Niu Sila, Iapani. Ia ou te le i oo la i isi vaega ia, a o le taimi a o avea au ma sui usufono o le tatou Malo ou te alu i le tofi lea a le ACP lea o lo o galue ai nei le Tofa ia Faumui, o i ina na ou iloa ai le maualuga o le auaunaga a o tatou sui ia o lo o i fafo, aemaise lava tatou sui lea e i Peleseuma i ina i Europa, o i ina e masani ona ou alu i ai, aemaise foi le aufaigaluega. O mea ia o lea e talanoa ai le tatou Taitai, o le amanaia o Samoa, o le amanaia o Samoa. Aisea? Aua e o ae le tatou aufaigaluega la e i o ua lava tapena ae, lava tapena. E le o ni tagata faaletonu. E oo foi i taimi e tuua ai au o le taitai o le usugafono, e le mafai ona faapea e faaletonu le tapenaga a officials, o ma i inei. E momoli atu ai lau faafetai tele i tatou sui o lo o i fafo aemaise foi le Matagaluega a le Va i Fafo e masani ona matou o i malaga nei. E ese lou fiafia i le tulaga tulai mai ai a latou auaunaga ia te au, po o le ta o le fia i le vaveao e uma ai le fonu, e le mafai ona faaletonu ua i ai lau lauga e tapena mo le isi aso. E mimita ai le agaga. O le mea lena a tu loa le taitai o le usugafono a Samoa i luga, e faalologo uma tagata. Aua foi latou te iloa o le sui o Samoa, e le o ni sui faaletonu, e le o ni sui faaletonu. A o tapenaga a tatou officials nei, lea e tu matie ai se lauga a le taitai o le usugafono.

Ia, o le agaga lava o le faafetai lau Afioga i le Fofoga Fetalai. E faamalie atu. Ou te fia faafetai lava i le Faalapotopotoga lea a le ADRA lea o lo o galulue ia siitia le tulaga o alaalfaga i tua i le taitaiga a le tamaitai, le Afioga

ia Sua Julie Wallwork ma lana aufaigaluega. Sa ou faatagisia i se fesoasoani e fai ai le hall a le matou aoga tulagalua. E leai lava se faapea na umi ona faataamilo, o la ua tu le hall a si ou itumalo. O lea foi e faagasolo atu isi a latou polokalame, tasi lenei Faalapotopotoga e sili ona lelei le pulega ma le faiga o a latou galuega, transparency and accountability. O le mea lena o lea e faataua e le tatou Malo, e maua lelei ai lava i i le vaega lea. E momoli atu atu le faafetai. Ia, atoa ai foi ma tatou paaga masani i a latou galuega sa faia mo si ou itumalo. Ia, o Iapani, Saina, Niu Sila, Ausetalia. O lo o ua tulai mai atinae ona o la latou fesoasoani.

E faatalofa atu i si o matou falemai faaitumalo o Satupatea. Faamalo atu i alii ma tamaitai fomai o lo o galulue i le taimi nei foi ma faalogologo mai, malo. O lea ua maua le avanoa, aua o le tele lava o outou, o alo ma fanau a o tatou itumalo e 3, o Palauli le Falefa, Satupaitea ma Palauli Sasae. O lea o le a sui o latou igoa pe a uma nei le Paeaiga lenei. Ia o lea ua maua le avanoa tou te tautua ai le tatou itumalo o outou o fomai. O lea ua maua le avanoa i le tatou falemai lenei, alo ane laia e galulue ma tautua si o tatou itumalo.

O lau faafetai lau Afioga i le Fofoga Fetalai i si ou aiga i le lagolago tele mai i na tausaga aemaise foi le 5 tausaga lenei a o ou tauavea le tofi. Faafetai mo lau tautua ma lau tatalo. Tai, e le faigofie le tulaga o le ta aiga sa i ai, ia, a o le valaauina a le Atua e eseese lava. Ou te nofo lava au i inei ma fai ou tiute faa-faipule, ae alu oe i Europa e fai ou tiute faava-o-Malo, Ia o le mea sili, o lea ua e toe foi mai, toe foi mai e tautua Samoa ma auli lelei ou ofu ou te lotu ai i le aso Sa. O si au fanau o lo o nonofo mai Niu Sila, thank you for your support.

O ou uso ma tuafafine o lo o alaala i nuu mamao, ia o le tala lava lena, faafetai i la outou lagolago, faafetai i lo outou lima foi i lou tauaveina o lenei tofi. Ia faatutumu e le Atua mea ua faagaogao. Nai ou aiga uma, uo ma e masani o lo o salalau i Samoa ma atunuu i fafo, ia faafetai. Ia alofa le Atua ma faafualoa outou soifua, ia tatou toe feiloai ai pea i ni aso oi luma, ae faafetai mo la outou tatalo ma la outou lagolago mai.

Lau Afioga i le Fofoga Fetalai, e faapitoa lava se faafetai i si ou tina. O lea ou te iloa o la e o lo o matamata mai i le TV. Faafetai Mama. Mai lava i le taimi sa ou faipule ai, e le i maluelue lau tatalo, lau fautua, lau tatalo lelea, o oe sa e tuuina mai le toa i lou loto, ma o oe o le papa sa ou tu ai i taimi e faaletonu ai mataupu a le nuu ma le tulaga faa-faipule. Faafetai i lou tatalo pea i aso uma. Faafetai foi i si ou tina i Ausetalia ia Foti, o oulua ia sa lua i i i le taimi na faatauto ai au. Ae paga lea, ia, ua matutua oulua soifua ma oo foi i le tulaga ua le mafai ona lua toe Malaga mai i inei. Ae o lau tatalo, ia faafualoa e le Atua oulua soifua ia tatou mafuta ai pea. O Foti lena ua 97 ou tausaga, ia, Mama lena ua 87 ou tausaga. Ua loa oulua soifua, ua loa foi le lua iloa, loa foi le lua tatalo pea aua se lelei o au nei. Faafetai faafetai tele.

Lau Afioga i le Fofoga Fetalai, ona ou toe foi mai foi lea... Ia, o lea lava e taumafai e faauma atu lau Afioga... Na o se talosaga pe faauma atu ia taeao,

toe lava o si ou itumalo lea ou te oo i ai ona uma ai lea. Na o si tatalo atu. Pe se i faaauau ia taeao, toe puupuu lava la e totoe.

FOFOGA FETALAI: Ia, ona o lea ua tatou taunuu i le tatou taimi manava, e manatu foi ne i ova le tatou galulue ona tuuaina foi lea o le tatou taimi, aemaise foi o le faaaaogagase o le Palemene. E i ai le manatu, e sili ia o lea...

Ia se i tulai mai lau Afioga i le Palemia se i...

LAFO MO LE SUIA O ITULA FONO

Susuga Hon TUILAEPA AUUEA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ona o le Tala o le Tupe mulimuli lenei o le tatou Paeaiga, ma ua matauina foi le sagisagi naunau fiafia olioli ma le faagaetia tusaafia o Minisita e talifuaitea faamatagitagi i mataupu taitasi sa laga e sui usufono, ou te faatu ai le lafo, *Mo le suia o tatou Itula Fono mo Taulumaga a le Fono Aoao e faapea:- Faataatiaese nei a tatou Taulumaga o le Fono Aoao i le 1:00 i le aoauli lenei, ona toe faaauau lea i le itula e 6:00 i le 10:00 i le po ina ia taumafai ai e faamaea galuega a le Kapeneta ae amata mai le aso a taeao. O le lafo ua faatu nei e amata faamamalu i le aso a taeao.*

Ae a faapea e oo atu foi i le aso Faraile e le i maea lava, o le a faaauau i le aso Faraile toe faaauau i le aso Toonai. Tatou te le i Fono atoa foi i se aso atoa o le aso Toonai ma le po. Ia, pe a faapea e faaui ane nisi o outou alofaaga i taitoalua ma matua i se tusi agai ane i tua, ina ia vave ai le tatou Fono.

Ia o le lafo faatu lea lau Afioga.

Faamaonia e le Minisita mo Tina ma Tamaitai, Atinae o Nu'u ma Afioga ma Agafesootai ma le Minisita mo Pisinisi, Alamanuia ma Leipa.

Na faamaonia le lafo.

FOFOGA FETALAI: Ia, o le faapena. Se i faaiu ia taeao lau saunoaga. Ua maea?

Afioga Hon LAUTAFI FIO SELAFI PURCELL: Leai toeitiiti uma.

FOFOGA FETALAI: Oi ia, e i ai le manatu i toeitiiti ae afa itula lava o fai. Ae taatia ia mo taeao. Ia, leaga o lea ua fai le faaiuga.

Ae tatou te le i tolopo ou te tapa le sui usufono mo Faasaleleaga Nu.4 e tulai maia e faaiu le tatou Fonotaga i se tatalo.

Na tolopo Taulumaga a le Fono Aoaofaitulafono i le itula e 1:10 i le afiafi seia aulia le Aso Lulu, 24 Fepuari 2021 i le itula e 9:00 i le taeao.